

Dill' wen dill' kob daa bzej Márcona'

Juanna', beena' bchoa beṇ' nis
(Mt. 3:1-12; Lc. 3:1-9, 15-17; Jn. 1:19-28)

¹ Ki wzolo dill' wen dill' kob che Jesucrístona',
beena' nak Xiin Chioza'.

² Gok ka wna dii Isaíaza', beena' wdixjee daa goll
Chioza'ne':

Wselaa to beṇ' kwialoe' lawo'na',
wi'e xtilloona' kwenche ba lle' beṇ' wzenague' cho'
kat' illino'.

³ To beṇ' wnie' zilljə to lo latj gana' bibi chashj
chleb, chi'e:

“Li se kwas wzenagle che Xanchona' na' wsalj
yichjlall'do'leka' kat' zee.”

⁴ Na' bllin Juanna' latja' gana' bibi chashj chleb.
Bchoe' beṇ' nis, na' wdixje'ile' beṇ' chiyal' yiyaj
yilengakile' na' choagake' nis kwenche yizi'xen
Chioza' saaxya che'ka'.

⁵ Na' yog' beṇ'ka' lle' gana' mbani Judeana' na'
beṇ'ka' lle' yell Jerusalénna' jazenaggake' dillaa
cho'e. Na' bixoadol'gake' saaxya che'ka', na' bchoa
Juanna' legake' nis loo yao Jordánna'.

⁶ Na' xa Juanna' gokan de xa kamey na' bchej
lsineena' to yid. Na' wdawe' bish'zo na'ch shin
baser dii de lyixaa.

⁷ Na' wdixje'ile' beṇ'ka' cho'a xtill' Chioza', chi'e:
—Zi' za'lə beena' napch yel' wak xench ka
nad', na' ni bi zakaa gak' xmose' kwenche wlechj'
xele'na'.

⁸ Nad' ba bchoa' le' nisa', san le', gone' ka yidsoa Espíritu che Chioza' loo yichjall'do'lena'.

Jesúza' wchoe' nisa'

(Mt. 3:13-17; Lc. 3:21-22)

⁹ Na' kana'yen' Jesúza' wzee yell Nazareta' daa llia gana' mbani Galileana' na' wyaje' cho'a yao Jordanna' gana' bchoa Juanna'ne' nisa'.

¹⁰ Na' shlak chichej Jesúza' loo nisa', ble'ile' byalj yabana' na' betj Espíritu che Chioza' jsoalene'ne' na' ble'ile' Espírituna' ka to palom.

¹¹ Na' bengakile' wne Chioza' yabana', chi'e Jesúza':

—Lin' nako' Xiin', chakchgaid' li' na' le' chibaid' li'.

Dii xiwaa goklalliin kooyela'n Jesúza' gone' ka cheenin

(Mt. 4:1-11; Lc. 4:1-13)

¹² Na' lii bche'te Espíritu che Chioza' le' latja' gana' bibi chashj chleb.

¹³ Na' wzoe' na' choa lla ladj ba zniaka', na' Satanáza' daa chnabia' dii xiw'ka' goklalliin kooyela'n le' gone' ka cheenin. Na' ka wde, jaklen anjlka' le'.

Wzolo Jesúza' choe'lene' ben' xtil' Chioza' gana' mbani Galileana'

(Mt. 4:12-17; Lc. 4:14-15)

¹⁴ Biyoll wloogake' Juanna' lillyana', Jesúza' wyaje' gana' mbani Galileana' na' je'lene' ben' dill' wen dill' kob che Chioza',

¹⁵ chi'e:

—Ba bllin lla inabia' Chioza' loo yichjall'do'lena'. Li yiyaj yileni dii malka' chonle na' li shajle' dill' wen dill' kob che'na'.

Jesúza' goxe' tap ben' wxen bel
(Mt. 4:18-22; Lc. 5:1-11)

¹⁶ Shlak ngoo Jesúza' nez cho'a nido' che Galileana', ble'ile' Simónna' len ben' bishee Andréza', chzal'gake' yixj daa chzengakile' belka' loo nido'na', la' lennan' noni xshingake'.

¹⁷ Na' goll Jesúza' legake':

—Li da, dino nad'. Na' ka chonle chbejle belka' loo nisi, ka'kzan gonle yibejle ben' lao dii mala'.

¹⁸ Na' ka biyoll golle' legake' ka', lii bkwaan'tegake' yixja' daa chzengakile' belka' na' zejlangake'ne'.

¹⁹ Ka ba wza'gake' zi lat', ble'i Jesúza' Jacóbona' len ben' bishee Juanna', ben'ka' nak xiin Zebedewa', lle'gake' loo barkwa' chiyonshao'gake' yixja' daa chzengakile' belka'.

²⁰ Na' lii wnetie' legake', na' bkwaan'gake' xe'ka', beena' le Zebedeo, len ben'ka' chaklen legake' loo barkwa', na' wyajlangake' Jesúza'.

Jesúza' bibeje' dii xiwaa yoo to ben'
(Lc. 4:31-37)

²¹ Na' bllingake' yell Carpernaúma'. Na' lla sabda', llana' chombaan ben' Israelka', wyaj Jesúza' gana' chdop chllaggake' choe'lwillgake' Chioza' na' wzoloe' chli' chsedile' legake'. ²² Na' bibani ben'ka' lle' na' ka chli' chsedile' Jesúza', la' bli' bsdile' legake' lega ben' nap yel' wñabia', na' bi chli' chsedile' ka ben'ka' chli' chsedile' leya'.

²³ Na' ladj ben'ka' chdop chllag gana' chli' chsedile' legake', len to ben' yo'e dii xiwaa, na' besyaan, che'n:

24 —jJwayi neto', Jesús, beṅ' Nazaret! ¿Abido' kwenche wliiayoo neton'? Nad' nombi'a li' na' neṅid' nako' dowalj beṅ' li beṅ' shao' che Chios.

25 Na' Jesúza' bsheshlene'n, chi'e:

—jLizə wzoa! jBichej loo yichjlall'do' beeni!

26 Na' dii xiwaa wchooṅan beena' na' bchix btolan le' na' bichejan chosyaadian.

27 Na' yog' beṅ'ka' lle' na' bibangakile', na' che' ljwellgake':

—¿Bi dii kob dga chli' chsedi beeni, lla? jNakbia' nape' yel' wṅabia', la' axt len dii xiw'ka' chsheshlene' na' chozogakan xtillee!

28 Na' lii wzete dill' doxen gana' mbani Galileana' ka nak daa chon Jesúza'.

Jesúza' biyone' tobiin che Simón Pédrona'

(Mt. 8:14-15; Lc. 4:38-39)

29 Na' biza' Jesúza' gana' chdop chllaggake' na' biyajlene' Jacóbona' len Juanna' lill Simónna' na' Andréza'.

30 Na' tobiin che Simónna' die' yo'e dii la. Na' gollgake' Jesúza' daa chak che'.

31 Na' wbiguee gana' die' na' bexee neena' blise'ne'. Na' lii bichejte dii lana' na' wzoloe' bene' daa wdaogake'.

Jesúza' biyone' beṅ' zan

(Mt. 8:16-17; Lc. 4:40-41)

32 Na' ka ba wxoa wbilla', jwa'gake' lao Jesúza' yog' beṅ'ka' bi shao' na' beṅ'ka' yoo dii xiwaa.

33 Na' yog' beṅ'ka' lle' yella' bdi'a bllaggake' cho'a yoona' gana' zoe'.

34 Na' Jesúza' biyone' beṇ' chak wde wdeli yillwe'. Na' lekzka' bibeje' dii xiw'ka' yoo beṇ', na' bi bi'e latj inegakan daa nombia'gakan le'.

Jesúza' cho'e cho'a xtill' Chioza' gana' mbani Galileana'

(Lc. 4:42-44)

35 Na' Jesúza' wyase' ni baḷ, na' bcheje' yella' jelwille' Chioza' ga kono beṇ' lle'.

36 Na' wyaj Simónna' len beṇ'ka' nakgake'ne' txen jadiljgake'ne',

37 na' ka billelgakile'ne' na'ch gollgake'ne':

—Yog'z beṇ' chiyiljgake' li'.

38 Na' che' Jesúza' legake':

—Li sho' yellka' sto, diika' llia gaozə, kwenche lekzka' llje'len' cho'a xtill' Chioza' beṇ'ka' lle' na', la' ni cheyinnan' bid'.

39 Na' wda Jesúza' yog' yellka' llia doxen gana' mbani Galileana' choe'lene' beṇ'ka' cho'a xtill' Chioza' yog' gana' chdop chllag beṇ' Israelka' choe'lwillgake' Chioza', na' bibeje' dii xiw'ka' yoo beṇ'.

Jesúza' biyone' to beṇ' chak yillwe' daa le lepra

(Mt. 8:1-4; Lc. 5:12-16)

40 To beṇ' chak yillwe' daa le lepra blline' lawe'na' na' bchek' xibe'na' lawe'na', chi'e:

—Shi cheenilo', wak yikwaso' yillwe'ni chak'.

41 Na' biyesh'lallii Jesúza'ne', na' bxoə neena' yichje'na' chi'e:

—Cheenid'x. Na' naate yikwasa'n.

42 Na' katena' lli bikwaste léprana' na' biyakile'.

43 Na' Jesúza', chi'ene':

44 —Kono yoo dga ba ben' cho'. San wyaj jali'lawo' lao bxoza', na' jwa' daa chiyal' lljoo lao Chioza' ka nllia dii Moiséza' bia' goncho kwenche inezile' ba biyakilo'.

45 Per ka bizee, wzoloe' bi'e dill' lao yog'lol ben' daa gokə. Na' daa bene' ka', bich gok sho' Jesúsza' ka nla'zə yellka', san bigaane' ga kono ben' lle'. Per bia'kzə wyaj ben' za' wde wdeli yell jawiagake'ne'.

2

Biyon Jesúsza' to ben' net ni'a neena' (Mt. 9:1-8; Lc. 5:17-26)

1 Wde to chop lla, Jesúsza' billine' sto shii yell Capernaúma'. Na' ka wnezi ben'ka' lle' na' ba billine' yooná' gana' wzoe',

2 na' bdi'a bllag ben' zan inleeb loo yooná' axt bich chaki lesh' chyooná' she'gake'. Na' bli' bsdile' legake' cho'a xtill' Chioza'.

3 Na' bllin tap ben' nleŋgake' to ben' net ni'a neena'.

4 Na' daa bi gok illingake' gana' zete Jesúsza' daa lle' ben' zan inleeb, na' wzologake' bsaljgake' koll' yooná' na' bletjgake'ne' do daa che'na'.

5 Na' ka gokbe'i Jesúsza' chajle'gake' che', golle' ben' we'na':

—Xiin, ba biyakxen saaxya cho'ka'.

6 Na' chi' bal ben'ka' chli' chsedi leya', na' wza'lall'gake':

7 “¿Berache naz beeni ka'? Chonz kwine' ka Chioza'. Kono zoa sto ben' gak yizi'xen saaxya che ben', san toz Chioza' gak yizi'xene'n.”

8 Na' lii gokbe'teyi Jesúsza' daa chza'lall'gake', na' wnable' legake', chi'e:

—¿Berache chza'lall'zle ka'?

⁹ ¿Achakile chyalljchid' yel' wak xench yep' beeni: “Ba bizi'xen' saaxya cho'na”, ka daa yepee: “Biyas na' bigoo nez”?

¹⁰ Na' wliid' le', nad' Ben' Bsel' Chioza' nap' yel' wnabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

¹¹ —Nia' li', biyas, bitob daa cho'na', na' biyaj lillo'na'.

¹² Na' lii biyastie' bitobe' daa che'na' na' bizee chwiate ben'ka' lle' na'. Na' yog'zgake' bibani na' be'la'ogake' Chioza', che'gake':

—Bigan' ile'icho ka dga.

*Jesúza' goxe' Levína' kwenche gake'ne' txen
(Mt. 9:9-13; Lc. 5:27-32)*

¹³ Na' wyaj Jesúza' sto shii cho'a niso'na' na' ben' zan janogake'ne', na' bli' bsedile' legake'.

¹⁴ Na' wde Jesúza' gana' chi' Levína', xiin Alfewa', chchixje' daa chkaa ben' Rómaka'. Na' chi'ene':

—Da, dino nad'.

Na' wzolla' Levína' janoe'ne'.

¹⁵ Na' to shii Jesúza' len ben'ka' nakgake'ne' txen cheej chaogake' lill Levína', na' zan ben' wichixjka' na' ben'ka' zeyi chegake' nakgake' ben' mal cheej chaolengake'ne', la' ben' zan ba nak ben'ka' no le'.

¹⁶ Na' bal' fariseoka', ben'ka' lezkka' chli' chsedi leya', ka ble'gakile' cheej chaolen Jesúza' ben'ka', na' gollgake' ben'ka' nakgake'ne' txen:

—¿Berache cheej chaolenz beena' chli' chsedi le' ben' wichixjka' na' ben' malka'?

¹⁷ Na' ka beni Jesúza' che'gake' ka', na'ch chi'e:

—Ben'ka' zoa shi'a shao' aga no wen rmech chyalljgakile', san ben'ka' bi shawaan chyalljgakile'ne'. Ka'kzə nad', aga bid' ni che ben'ka' nak ben' li ben' shao', san ni che ben' malkan' bid'.

Wnabgakile' Jesúza' biche bi chon ben'ka' nangkake'ne' txen wbasaa
(Mt. 9:14-17; Lc. 5:33-39)

¹⁸ To shii ben'ka' nak Juanna' txen na' ben'ka' nak fariseoka' txen chzoagake' wbas'. Na' bal' ben' wyajgake' lao Jesúza' na' che'gake'ne':

—Ben'ka' nak Juanna' txen na' ben'ka' nak fariseoka' txen chzoagake' wbas'. ¿Berache ben'ka' nangkake' li' txen bi chongake'n?

¹⁹ Na' che' Jesúza' legake':

—¿Awak soa ben'ka' chaxe' to ga chak wishagna' wbasaa shlak chak lnina'? Bi gakan, la' shlak zoalen beena' chshagna' legake' aga wak soagake' wbasaa.

²⁰ San wllin lla kat' yikwas ben' beena' chshagna' ladje'ka', kana'chan soagake' wbasaa.

²¹ 'Ni to ben' bi chida' chichollee lee lech' gola' lat' lech' kob, la' lech' koba' yibe'n kat' chibe'n na' zizikli wchez'chan lech' gola', na' dii xench gak gana' nchez'.

²² Ni biga zoa ben' chguee vino koba' loo yid golka', la' vino koba' wchezaan yid gola' na' kwiayi' vino koba' lente yid gola'. Na' daan, chiyal' shall vino koba' loo yid koba'.

Ben'ka' non Jesúza' txen chyishjgake' do che trígona' llana' chombaan'gake'
(Mt. 12:1-8; Lc. 6:1-5)

²³ Na' to lla sabd, llana' chombaan ben' Israelka', wdelen Jesúza' ben'ka' nakgake'ne' txen to ga naz to ben' trigo, na' wzolo ben'ka' nakgake'ne' txen wdishjgake' trígona' wdaogake'n.

²⁴ Na' goll fariseoka'ne':

—¿Berache chonz ben'ki nako' txen daa bi chiyał' gongake' llani chombaancho?

²⁵ Na' golle' legake':

—¿Ani shlin bin' wlable daa ben dii Davina' to shii kon ben'ka' nakgake'ne' txen ka byallj daa gaogake'?

²⁶ Kana' nak Abiatara' b̄xoz choo b̄xoz xen, wyoo Davina' gana' nongake' lill xlatjə Chioza' na' wdoyoe' yetxtila' daa naki che Chioza' na' wdao-lene'n ben'ka' nakgake'ne' txen, la'kzi toz b̄xozkan' chiyał' gaogake'n.

²⁷ Na' lekzka' golle' legake':

—Chioza' wleje' llani chombaancho kwenche gaklenan benecha', aga b̄xe bsile' benecha' kwenchezə we'la'ogake' llani chombaancho.

²⁸ Daan, nad', Ben' Bsel' Chioza' Yell-lioni, chnabi'a lao llani chombaancho.

3

Beena' net neena' t̄laa
(Mt. 12:9-14; Lc. 6:6-11)

¹ Na' sto shii wyaj Jesúza' gana' chdop chllag-gake' choe'lwllgake' Chioza' na' ladj ben'ka' lle' na' len to ben' net neena' t̄laa.

² Na' chwiayen'gake' shi wiyon Jesúza'ne' lla sabda', llana' chombaangake', kwenche gaogake' xya che'.

³ Na' che' Jesúza' beena' net neena' t̄laa:

—Wzolla' na' wze gchol_l beṅ'ki.

⁴ Na'ch wṅabile' beṅ'ka' ndop nllag na':

—¿Beran na leya' chiya_l' goncho lla sabdka?
¿Agoncho daa nak wen, anti goncho daa nak mal?
¿Ayislacho beṅ', anti witchone'?

Na' kokzno billii xtilleena'.

⁵ Na' ka chwie' beṅ'ka' lle' na', bllee na' gokyeshile' daa nakgake' beṅ' lall'do' cheḥ, na' chi'e beena':

—Bli noona'.

Na'ch bli na' beena' na' lii biyakteyin.

⁶ Na' bichej fariseoka' na' wzologake' chgoogake' xṅezin len beṅ'ka' non Heródeza' txen kwenḥe witgake' Jesúza'.

Beṅ' zan bdop bllag cho'a nisdona' gana' chda Jesúza'

⁷ Na' biza' Jesúza' gana' zoe' na' zejlene' beṅ'ka' nakgake'ne' txen cho'a nisdona' na' beṅ' zan beṅ' Galiléaka' wnogake' legake'.

⁸ Na' beṅ' zan beṅ'ka' lle' gana' mbani Judeana', na' yell Jerusalénna', na' gana' mbani Idumeana', na' beṅ'ka' lle' sh_laa yao Jordánna' na' yellka' ndil nllag yell Tírona' na'ch yell Sidónna', ka wṅezgakile' chon Jesúza' dii zan yel_l' wak, na' wyajgake' jawiagake'ne'.

⁹ Na' daa lle' beṅ' zan inlleb, golle' beṅ'ka' nakgake'ne' txen yisbig'gake' to barkw gana' lljshie' kwenḥe bi idakwyill' beṅ' be beṅ' zilka' le'. ¹⁰ La' beṅ' zan inlleb ba biyone' na' yog' beṅ'ka' bi shao' chdi'a chllaggake' lawe'na' kwenḥe gox'gake'ne' na' yiyakgakile'.

11 Na' dii xiw'ka' yoo bal ben'ka', ka chle'gakin Jesúza', chongakan ka ch'chek' xib ben'ka' lawe'na' na' chosyaagakan, che'gakan:

—¡Lin' nako' Xiin Chioza'!

12 Na' Jesúza' bsheshlene'gakan kwenche bi inagakan ka' ga lle' lla' ben'.

Jesúza' chbeje' shllin postlka'

(Mt. 10:1-4; Lc. 6:12-16)

13 Ka biyoll ben Jesúza' diika', na' wleje' bal ben'ka' wyazlallee gakgake'ne' txen na' wyajlengake'ne' to lo yaa.

14 Na' wleje' shllin ben'ka' kwenche talengake'ne' txen na' kwenche wselee legake' llje'gake' cho'a xtill' Chioza', na' bsi'e legake' postl.

15 Na' bi'e legake' yel' wñabia' kwenche yiyongake' ben'ka' bi shao' na' yibejgake' dii xiw'ka' yoo ben'.

16 Ben'kin wleje' shllin: Simónna', beena' bisi'e Pedro;

17 Jacóbona' len ben' bishee Juanna', ben'ka' nak xiin Zebedewa', (ben'ka' bsi'e Boanerges, daa zeji ben' nak ka yi' wziw' dii chashj chtin);

18 na' Andréza', Felípena', Bartoloména', Matewa', Tomásza', Jacóbona', xiin Alfewa', Tadewa', Simón, beena' wlen cananistka',

19 na'ch Jud Scariota', beena' bene' Jesúza' lo na' ben' malka'.

Wnagake' che Jesúza' bchine' yel' wak che dii xiwaa

(Mt. 12:22-32; Lc. 11:14-23; 12:10)

20 Na' Jesúza' len ben'ka' nakgake'ne' txen biyaja-gake' gana' zoagake'. Na' daa bizdi'a bizllag ben'zan inlleb, ni bi gok latj gaogake'.

21 Ka wñezi ben'ka' nak bish' ljwell Jesúza', wya-gake' nan lljaxi'gake'ne', la' gokgakile' ba chaktonte'n.

22 Na' lekzka' ben'ka' chli' chsedi leya', ben'ka' zaak Jerusalénna', nagake' che':

—Bezlo daa chñabia' dii xiw'kan' yo'e, na' yel' wak cheyinnan' chisheshile' dii xiw'ka'.

23 Na' gox Jesúza' legake' na' bzoe' to jempl lawe'ka', chi'e:

—¿Nakra gon Satanáza' yibej ljwell dii xiwiinna'?

24 Ben'ka' lle' toz yell shi til-len ljwellgake' na' gaggake' choplə, aga ssha soagake'.

25 Na' ben'ka' lle' toz yoo shi illaa ljwellgake' na' gaggake' choplə, aga ssha soagake'.

26 Na' shi Satanáza' na' dii xiw'ka' nak lall' na'yin yiyakdiligakan na' gaggakan choplə, bi idiagakan, san ba bllin lla kwiayi'gakannan', shi naa.

27 'Kono gak sho' loo yoo lill to ben' wal na' kwane' bi de che' shi bi wñeje'ne' zigaate, na'chan wtesh wlo'e' loo lille'na'.

28 'Dii li nia' le', Chioza' yizi'xene' yog'lol saaxya na' yog'lol dii mal daa chbell chñe ben' che';

29 san beena' ñe zban che Espíritu Sántona', biga yizi'xene' che', na' toshiizi gak xbagee cheyi daa wchell wñie' che'.

30 Golle' legake' ka' daa wnagake' che' dii xiwaan yo'e.

*Xna' Jesúza' na' ben' bisheeka'
(Mt. 12:46-50; Lc. 8:19-21)*

31 Na'ch bllin x̄na' Jesúza' len beñ' bisheeka',
wzegake' lesh' chyoonā' na' bsel'gake' beñ'
janegake'ne'.

32 Na' beñ'ka' chi' kwit Jesúza' gollgake'ne':

—Ba chiyilj x̄noona' li' len beñ' bishooka'.

33 Na' chi'e legake':

—¿Añezile noran x̄na'na' na' beñ' bishaaka'?

34 Na' chwie' beñ'ka' chi' kwite'na' na'ch chi'e:

—Beñ'kin x̄na'na' na' beñ' bishaaka'.

35 Nottezə beena' chon ka cheeni Chioza', len'
beñ' bishaana', beñ' zanna' na'ch x̄na'na'.

4

Jempl che to beñ' goz goon

(Mt. 13:1-9; Lc. 8:4-8)

1 Sto shii wzolo Jesúza' bli' bsedile' beñ' cho'a
nido'na', na' daa bdop bllag beñ' zan inleeb jshie'
to loo barkw daa chi' cho'a nido'na', na' beñ'ka'
bdi'a bllag wlle'gake' cho'a nido'na'.

2 Na' dii zan dii bli' bsedile' legake' na' bchine'
jemplka', na' golle' legake':

3 —Li wzenag dga. To beñ' goz goon wzee zeje'
goza'.

4 Na' ka zej chzalee binna', bañan bxop cho'a neza'
na' bllin byinka' wdaogakban.

5 Na' zi bañan bxop ladj yajka', gana' bitek bi yo
chi'. Na' tolbe' bilaan, daa bi chi'tekan yona'.

6 Per ka bla' wbillā', bkwedgakan. Na' daa bi bde
loinna', wbillan.

7 Na' zi bañan bxop ladj yag yesh'ka' na' yag
yesh'ka' bi be'gakan latj igolgakan na' bibi wllian.

⁸ Na' zi ba_{lan} bxop gana' chi' yo wenna', na' bgolgakan na' le wllia_gakan. Ba_{lan} wllia shichoa wej, na' zi ba_{lan} guiyon wej, na'ch to guioa wej.

⁹ Na' chi'e legake':

—Ka le' chenile dga nia', li sen wneyi.

Jesúza' bzajniile' legake' biçhe chseese jemplka'
(Mt. 13:10-17; Lc. 8:9-10)

¹⁰ Na' ka bgaan stoz Jesúza', be_n'ka' wlle' gaoshosh kwite'na' len be_n'ka' shllin, w_nabgakile'ne' bi zeji jempla' daa bseesile' legake'.

¹¹ Na' chi'e legake':

—Chioza' cho'e latj inezile daa kono w_nezi che yel' w_nabia' che'na'. Per be_n'ka' bi chzenag che', chseesid' legake' jemplka'

¹² kwenche la'kzi ile'tegakile' ka chon', bi shajni'gakile' bi zejin, na' la'kzi yentegakile' xtilaana', bi shajni'gakile'n, kwenche bi yiyaj yilengakile' lao Chioza' na' bi yizi'xene' chegake'.

Jesúza' bizajniile' bi zeji jempla'
(Mt. 13:18-23; Lc. 8:11-15)

¹³ Na' chi'e legake':

—Shi bi chajniile jempli, ¿nakra gonle shajniile diika' sto?

¹⁴ Beena' chaz zaklebile' beena' choe' cho'a xtill' Chioza'.

¹⁵ Zoa be_n' chengakile' cho'a xtill' Chioza' na' kat' ba bengakile'n, lii zejte dii xiwaa chikwasan daa loo yichjlall'do'eka'. Na' chak chegake' ka gok che bi_nna' daa bxop cho'a neza'.

¹⁶ Zi ba_lgake' chak chegake' ka gok che bi_nna' daa bxop ladj yajka' na' aga bi logakin bde. La' ka

chengakile' cho'a xtill Chioza' chiba chizak'gakile' chzenaggake'n

17 per shlollchga chajle'gake'. Na' kat' bi chen chle'gakile' ni che cho'a xtill' Chioza', lii chbej yichjtegake'n.

18 Zi balgake' chak chegake' ka gok che binna' daa bxop ladj yag yesh'ka'. Chengakile' cho'a xtill' Chioza',

19 per chi' yichjgake' diika' chak chegake', na' zetegake' wneyi che yel' wni'ana' na' chzelall'tegake' yog'lolte daa de yell-lioni. Na' legakannan' chsej chllongakan gon xshin cho'a xtill' Chioza' loo yichjlall'do'eka'.

20 Na' zoa zi bal ben' chengakile' cho'a xtill' Chioza' na' chajle'gake' do yichj do lall'gake', na' chon xshinin loo yichjlall'do'eka'. Na' chak chegake' ka binna' bxop lo yo wenna' daa wllia shichoa wej, na' guiyon wej na'ch to guiyoa wej.

Jempl che to kandil
(Lc. 8:16-18)

21 Na' lekzka' chi'e legake':

—Biga zoa ben' chxene' kandila' na' chdose'n to dii wkwashaan len wa chni'en xan xlague'na', san chzoe'n sibə kwenche wzeeni'n doxen loo yoona'.

22 Na' lekzka' yog'lolte dii ngash' naa wllin lla yila' lawin, na' daa kono nezi naa wllin lla inezi benaan.

23 Le' chenile dga nia', li sen wneyi.

24 Na' lekzka' chi'e legake':

—Li se wneyi cheyi dga chzenagle. Na' shi gonle ka dii le, Chioza' wzajni'chile' le' dii xench.

²⁵ Beena' chzenag, zizikchli shajni'chile', na' beena' bi chzenag, axt daa ba benile' lat' yiyal-lallee.

Jempl che binna' daa chgol

²⁶ Na' lekzka' chi'e legake':

—Yel' wñabia' che Chioza' zaklebin daa chak che binna' chaz ben'.

²⁷ Beena' chaz chaan, chila' daa chaze' na' chgolan la'kzi chese' wa chechj chdaze', ka'kzə shi wal wa tella, na' ni bi nezile' nak chak chgolan.

²⁸ Lo yell-lioni chla' daa chaz ben': zigaate chila'n, na' chgolan, na' chzen do, na'tech chbian.

²⁹ Na' kat' ba gol daa chbian, na' chizi' chilape'n.

Jempl che sa mostásana'

(Mt. 13:31-32; Lc. 13:18-19)

³⁰ Lekzka' che' Jesúza' legake':

—¿Bera ka wsaklebicho yel' wñabia' che Chioza', lla? wa ¿bera ka jempl wchincho wsaklebichon?

³¹ Yel' wñabia' che Chioza' nakan ka sa mostásana' daa chazgake'. La'kzi lennan' binna' daa liizelozi nesh'ch,

³² kat' ba bla'n na'ch chgolan na' chakan dii xench ka yog'te yix' kwan yoblə, na' chak xozinka' dii xen axt byindo'ka' wak ljshiagakban na' sho'gakb xol cheyinna'.

Jesúza' bchine' jempl ka bli' bsdile' ben'

(Mt. 13:34-35)

³³ Dii zan jempl bchin Jesúza' ka bli' bsdile' ben'ka' cho'a xtil' Chioza', bene' kon ga zeelo wya-jni'gakile'.

34 Na' toshiizi bzo'e' jemplka' lao beṅ'ka' bdi'a bllag, na' toz beṅ'ka' nakgake'ne' txen bizajniile' bi zejin yog' diika'.

Jesúza' bkweze' to yejpe' wal lo nido'na'
(Mt. 8:23-27; Lc. 8:22-25)

35 Na' ka goḷ, golle' beṅ'ka' nakgake'ne' txen:
—Techo shḷaa nido'ni.

36 Na' biza'gake' kwit beṅ'ka' bdi'a bllag na' biḷhe'gake' Jesúza' loo barkwa' daa chi' cho'a nido'na', na' lench barkw yoblə ziyajlengake'.

37 Na' wze to yejpe' wal na' wzolo nido'na' chas chataan axt ba chiyollan loo barkwa', na' ba wzolo chbe'n yel.

38 Na' ba de Jesúza' chese' xaninna' nkogtie' to dii nkogue', na' jasangake'ne' che'gake':

—¿Maestro! ¿Abikzə chakbe'ilo' ba chbe'cho yel?

39 Na' wyase' bsheshlene' be'na', na' chi'e nido'na':

—Lliz wzoa.

Na' wlez be'na' na' wche'lli nido'na'.

40 Na' golle' beṅ'ka' nakgake'ne' txen:

—¿Biḷhe chllebzle? ¿Abikzan' gonḷilall'le nad'?

41 Na' le bllbgake', na' che' ljwellgake':

—¿Nora beeni, lla?, axt be'na' na'ch nido'ni chzoagakan xtillee.

5

Bibej Jesúza' dii xiwaa yoo beṅ' Gadárana'
(Mt. 8:28-34; Lc. 8:26-39)

1 Na'ch bllingake' gana' mbani Gadárana' daa lli shḷaa nido'na'.

2 Na' ka bichej Jesúza' loo barkwa', na' wbig' to beṅ' yo'e dii xiwaa. Na' beeni bcheje' loo kapsanta'

³ gana' none' ka lill xlatje'. Na' kono gok wchej le', ni gdenna' bi ben llin.

⁴ Zan shii bchejgake' ni'a neena' gdenka', na' tolbe'do' chchogue'gakan, na' kono wzoyi le'.

⁵ Ka wal ka tella chechj chde' yaa yaoka' na'ch kapsanta' chosyaadie' na' chgoyoe' yajka' chon kwine' zi'.

⁶ De zit'lə ble'ile' zej Jesúza' na' bxonjdoe' jatile'ne' na' jachek' xibe'na' lawe'na',

⁷ na' besyee zillj, chi'e:

—iBi wllalli' cho' kon nad', Jesús, Xiin Chios, ben' choo ben' xen! Chat'yoid' li', i bcheb lao Chioza' bi wsak'zi'o nad'!

⁸ Gollan ka' daa goll Jesúza' len:

—iDii xiw', bichej loo kwerp che beeni!

⁹ Na' goll Jesúza' len:

—iBin lio'?

Na' che'n:

—Legiónan lia', la' zannto' nak.

¹⁰ Na' got'yochgain Jesúza' bi wseleegakan gan yoblə.

¹¹ Na' gaozə kwit yaana' gana' lle'gake', lle' zan kush chaogakb.

¹² Na' got'yoii dii xiw'ka' le', che'gakan:

—Bsel' neto' gana' lle' kushka' na' be' latj yiy-oonto' legakb.

¹³ Na' bi'e latj chegakin, na' bichejgakan jay-oogakan kushka'. Na' nakgakb ka chopā mil, na' wzologakb chxonjdogakb jabixgakb loo nisdo'na', na' jche'gakb yel.

¹⁴ Na' ben'ka' chap kushka' ziyajdogake' jayell-gake' ben'ka' lle' yella' na' ben'ka' lle' lyixaa daa ble'gakile', na' ben' zan jawia daa gok.

15 Na' ka bllingake' gana' ze Jesúza', ble'gakile' beena' wyoo dii xiw'ka' chi'e kwite'na' ba biyakw xe'na' na' ba biyeen biyeeniile', na' bllebgake'.

16 Na' ben'ka' ble'i daa gok che beena' wyoo dii xiw'ka' na' daa gok che kushka', be'gake'n dill' lao ben'ka' bllin.

17 Na' got'yogakile' Jesúza' yiyaje' gan yoblə.

18 Ka chiyoo Jesúza' loo barkwa', beena' wyoo dii xiw'ka' got'yoile'ne' wi'e latj shajlene'ne'.

19 Per bi bi'e latj, san chi'ene':

—Biyaj lillo'na' gana' lle' bish' ljwello'ka', na' jayellgake' ka nak diiki ba ben Xancho Chioza' cho' na' ka ba biyesh'lallile' li'.

20 Na'ch biza' beena' na' jaye' dill' doxen gana' mbani Decápoliza' daa ben Jesúza' che', na' yog' ben' bibani.

Biyon Jesúza' noola' bex' xe'na' na' lekzka' xiin Jairona'

(Mt. 9:18-26; Lc. 8:40-56)

21 Ka billinlen Jesúza' barkwa' shlaa niso'na', na' bdi'a bllag ben' zan cho'a niso'na' gana' billine'.

22 Na' bllin to ben' le Jairo, nake' to ben'ka' chgoogake' xnezi diika' chon ben' Israelka' gana' chdop chllaggake' choe'lwillgake' Chioza'. Na' ka blline' gana' ze Jesúza', bchek' xibe' lawe'na'

23 na' benyesh'chgue', chi'e:

—Ba chet bi' cha'na'. Ben goklen sho'gach wxoa noona' yichjbaa kwenche yiyakib' na' ibanchb'.

24 Na' wyajlen Jesúza' le', na' ben' zan inlleb nogake'ne' ax̄t bdakwyillgake'ne'.

25 Na' ladj ben' zan walka' len to noolə ba gok shllin yiz chzoe' wbaa.

26 Dii zan dii ba ben ble'ile' lao ben' wen rmechka', na' ba bliiayee yog' dii de che' na' bi gokkze' rmech, san gokxinlile'.

27 Na' ka benile' xtill' Jesúza', jni'e ladj ben' zan walka' no le' na' jexee xe'na'.

28 La' gokile': "La'ch' xe'na' shel' ba bexaa, na' yiyakid'."

29 Na' katena' wlez wbaana' na' gokbe'ile' ba bigaa yillwe' che'na'.

30 Na' gokbe'i Jesúza' bchej yel' wak che'na', na' biyechje' chi'e ben'ka':

—¿Noran beḡ xa'na'?

31 Na' ben'ka' non le' txen che'gake'ne':

—Ben' zan walan ndakwyill li'. ¿Biḡhe nazo': "Non ba beḡ nad'?"

32 Na' ze Jesúza' chwie' ben'ka' lle' kwite'na' kwenche inezile' non beḡ le'.

33 Na'ch noola', daa ba gokbe'ile' biyakile', de chall chllebzile' wdie' na' bḡhek' xibe'na' lawe'na' na' golle' le' doxen daa ba gok che'.

34 Na' che' Jesúza'ne':

—Xiin', daa chonlilalloo nadaan ba biyakilo'. Biyaj mbalaz daa ba bigaa yillwe'na' bsak'zi' li'.

35 Na' ni chshaljte Jesúza' ka bllin to chop ben' wza' lill Jairona', chi'ene':

—Ba wit bi' cho'na'. Bich gonilo' maestroni zed.

36 Na' bi ben Jesúza' legake' kwent, na' golle' Jairona':

—Bi illebo'. Kon bḡenilall' nad'.

37 Na' bi bi'e latj shajlen ben' yoblə le', lete Pédrona' na' chop bish'te, Jacóbona' na'ch Juanna'.

38 Na' ka bllingake' lill Jairoⁿa', ble'ile' le chakyeshii beⁿ'ka' lle' na' na'ch chbellgake' na' le chosyaagake'.

39 Na' jabig^{uee} gana' lle'gake' na' golle' legake':

—¿Berache chonzle dan^e na' chbellzle? Aga ba wit bi'do'nan', san cheszbaan.

40 Na' bxillgakile' Jesúza'. Na' bisheshe' yog'l^{ole}' na' wyoolene' xax^{na}'baa na' beⁿ'ka' zejlene' txen gana' de bi'do'na'.

41 Na' be^xee na'baa na' golle'b':

—Talita, cumi* —na' zejⁱⁿ: Bi' nooldo', nia' li' biyas.

42 Na' bi' nooldo'na' lii biyasteb' na' bidab', la' ba gokkzib' shllin^{iz}an. Na' bibanchgayi beⁿ'ka' lle' na'.

43 Na' Jesúza' bene' mandad kono ye'gake' daa gok, na' golle' legake' we'gake' dii gao bi'do'na'.

6

Billin Jesúza' yell Nazareta' (Mt. 13:53-58; Lc. 4:16-30)

1 Na' biza' Jesúza' biyaje' lalle'na', na' beⁿ'ka' nakgake'ne' txen zejlengake'ne'.

2 Na' ka bllin lla sabda', llana' chom^{baan} beⁿ' Israelka', wyaje' gana' chdop chllaggake' choe'lwillgake' Chioza' na' wzoloe' bli' bsdile' beⁿ'ka' lle' na'. Na' zan beⁿ'ka' bzenag xtilleena' bibangakile', na' che'gake':

—¿Gara jasedz beeni diiki, lla? ¿Gara za' ye^l' sin' che beeni, na' ye^l' wakka' chone', lla?

* 5:41 Talita, cumi: dill'ki nakgakan dill' arameo.

³ ¿Aaga beenin karpintera', beena' nak xiin Maríana', na' beṇ' bish' Jacóbona', Joséna', Júdaza' na'ch Simónna'? Na' lekzka' beṇ' zane'ka' zoagake' lallchoni.

Na' bi wyajle'gake' che'.

⁴ Na' che' Jesúza' legake':

—To beṇ' chyixjee daa che' Chioza'ne', gattez ch-googake'ne' balaan, san lall lille'na' aga no chgoo le' balaan.

⁵ Na' aga bitek yel' wak gok gone' na', lete xonjchga beṇ' we'ka' bxoā neena' yichje'ka' na' biyone' legake'.

⁶ Na' bibanile' daa bi chajle' beṇ'ka' che'. Na' wde' bli' bsdile' beṇ'ka' lle' to to yellka' llia gaozə yell Nazareta'.

Jesúza' bselee beṇ'ka' shllin lje'gake' cho'a xtill' Chioza'

(Mt. 10:5-15; Lc. 9:1-6)

⁷ Na' wṇie' beṇ'ka' shllin, na' bselee chop weje', na' bi'e legake' yel' wṇabia' kwenche yibejgake' dii xiw'ka' yoo beṇ'.

⁸ Na' golle' legake' bibi gox'gake' kat' koogake' nez; bi chiyal' wa'gake' yixj ga koo xshinlaze'ka', ni dii gaogake', ni mech, san twejz yag bar gox'gake'.

⁹ Na' shkwe'z xelgake' wlej, na' zi shkwe'z xe'ka' gawk.

¹⁰ Na' chi'e legake':

—Yoona' gana' illinle, na'z soale axt ka illinch lla yiza'le.

¹¹ Na' yella' gana' bi wlebgake' le' ni bi wzenag-gake' chele, ka yiza'le na', yishible bishtena' llia ni'aleka' kwenche gakbe'gakile' aga wenan chong-gake' bi chlebgake' cho'a xtill' Chioza'. Dii li nia' le',

kat' illin lla wchoglo Chioza' che ben', ben'ka' lle' yella' gana' bi wlebgake' le', ile'gakile' ye'l zak'zi' xench aga ka ben'ka' wlle' yell Sodómana' na' yell Gomórrana'.

¹² Na' wza'gake' zjtixje'gakile' ben' chiyal' yiyaj yilengakile' saaxya che'ka'.

¹³ Na' bibejgake' zan dii xiw'ka' yoo ben', na' bshongake' lat' wej seta' yichj ben'ka' bi shao' na' biyakgakile'.

Betgake' Juanna', beena' bchoa ben' nis

(Mt. 14:1-12; Lc. 9:7-9)

¹⁴ Na' Heródeza', beena' wñabia' gana' mbani Galileana', benile' yog' daa chon Jesúza', daa le ba zeyi che'. Ba ben'ka' che'gake':

—Dii Juanna', beena' bchoa ben' nisan' ba biban, daan chone' ye'l wakka'.

¹⁵ Zi bale' che':

—Elíazan' ba biyed.

Na' zi bale' che':

—Nake' ben' chyixjee daa che' Chioza'ne', ka ben'ka' wzoa kani'yi.

¹⁶ Ka beni Heródeza' dill'ki, na' chi'e:

—¡Beenan' dii Juanna', beena' ben' mandad wchog yichje'na'! ¡Ba bibane' ladj ben' wetka'!

¹⁷ La' kwin Heródeza' bene' mandad bex'gake' Juanna' na' bseje'ne' lillyana' daa bseshlene'ne' daa bikee Herodíaza', xool ben' bishee, Felípena'.

¹⁸ Juanna' golle'ne':

—Xya nleeb nakan bikoo xool ben' bishoona'.

¹⁹ Na' bllaa Herodíaza' Juanna' na' goklallee wite'ne', per bibi gok gone'

²⁰ daa chleeb Heródeza' Juanna', daa nezile' nake' to ben' li ben' shao' ben' nak lall' na' Chioza', na' bi

bi'e latj no bi goni le'. Na' la'kzi chakçhoplallee çhe dill'ka' cho'e, bibaile' bzenague' çhe'.

21 Per ka wyayi Heródeza' yiz, bene' to lni na' goxe' beṇ'ka' chṇabia', na' xan soldadka', na' beṇ'ka' mbejlawin gana' mbani Galileana'. Na' got' xlatjin gon Herodíaza' ka cheenile'.

22 Na' bi' nool wew' che Herodíaza' byaab' lao beṇ'ka' lle' lṇina', na' le bibayi Heródeza' len beṇ'ka' chaolene' ka byaab'. Na' golle'b':

—Wṇab bittezə cheenilo' na' goṇa'n.

23 Na' bçhebe' wi'eb' daa cheenib', la'kzi axt gashj gana' chṇabi'e wi'eb'.

24 Na' bichejb' janabib' xṇa'baa:

—çBera ka iṇab', lla?

Na' che' xṇa'baa:

—Wṇab yichj Juan wichoa nisa'.

25 Na' lii biyooteb' gana' chi' Heródeza', na' che'b':

—Cheenid' yichj Juanna' to lo plat llilj ṇaate.

26 Na' le gokyeshii Heródeza', per daa ba bçheble' lao yog' beṇ'ka' goxe', bi goklallee wllonile'b' daa chṇabib' le'.

27 Na' lii bsel'tie' to soldad jaçhogue' yen Juanna' loo lillyana'

28 na' bllie' yichje'na' to lo plat. Na' bi'en bi' nool wewaa na' leb' be'baan xṇa'baa.

29 Ka wṇezi beṇ'ka' nak Juanna' txen, na' jaxi'gake' kwerp çhe'na' na' jakwash'gake'ne'.

Bwao Jesúza' gayaa mil beṇ'

(Mt. 14:13-21; Lc. 9:10-17; Jn. 6:1-14)

30 Ka billin postlka' gana' zoa Jesúza', na' goll-gake'ne' yog' diika' jengake' na' daa jali' jasedgak-ile' beṇ'.

³¹ Na' che' Jesúza' legake':

—Li sho' shajcho ga kono beṇ' lle' kwenche yizi'lall'lat'cho.

Golle' ka' daa le chdia chllag beṇ' zan lawe'ka', na' ni bi chak latj gaogake'.

³² Na' wyoogake' to barkw wyajgake' ga kono beṇ' lle'.

³³ Na' beṇ' zan ble'gakile' ka wza'gake' na' biy-ombia'gake' legake', na' wza'do beṇ'ka' lle' to to yell zejdogake' gana' illin barkwa' na' nechlagake' bllin.

³⁴ Na' ka bichej Jesúza' loo barkwa' ble'ile' ba bdi'a bllag beṇ' zan inleeb na' biyesh'lallile' legake' daa nakgake' ka xil'do', ba kono xanin zoa. Na' wzoloe' dii zan dii bli' bsdile' legake'.

³⁵ Na' ka wlle', beṇ'ka' nakgake'ne' txen wbig'gake' lawe'na' che'gake'ne':

—Ba wlle' naa, na' gani lle'cho kono zoa wit' dii gaocho.

³⁶ Goll beṇ'ki yiyajgake' ranshka', na' yellka' lia gaozə kwenche lljxi'gake' daa gaogake'.

³⁷ Na' che' Jesúza' legake':

—Len', li we' dii gaogake'.

Na' che'gake'ne':

—¿Nakra gonnto' lljxi'nto' yetxtilka' gao yog' beṇ'ki? la' wyejljain che chop guiyoa lla che laxj beṇ'.

³⁸ Na' che' Jesúza' legake':

—Li lljawia ka'k' yetxtilka' naple.

Na' ka wnežgakile' ka'ka'n de, na' che'gake'ne':

—De gayaan, na' zi chop beṇ'.

³⁹ Na'ch goll Jesúza' legake' kwekgake' xonj wej beṇ'ka' lo yixa'.

40 Na' wche' to guiyoa wejgake' na' shiyon wejgake'.

41 Na' bex' Jesúza' yetxtilka' gay' na' belka' zi chop na' blis jalawe'na' yabalə bi'e Chioza' yel' choxken, na' bxoxje' yetxtilka' bi'en ben'ka' nakgake'ne' txen kwenche be'gake' che che ben'ka'. Na' lekzka' yog'gake' be'gake' belka'.

42 Na' yog'lolgake' wdaogake' ka belgakile'.

43 Na' postlka' bitopgake' yetxtilka' len belka' bichoonan, na' biyakan zi shllin xet'.

44 Na' ben'ka' wdao, to ben' byoka'zə gokgake' gayaa mil.

Jesúza' wzee lo nido'na'

(Mt. 14:22-27; Jn. 6:16-21)

45 Na' ka wde, bigoo Jesúza' ben'ka' nakgake'ne' txen loo barkwa' kwenche yibialogake' lawe'na' yiyajgake' Betsáidana' daa llia zi shlaa nido'na', shlak bisee ben'ka' bdi'a bllag na'.

46 Na' ka biya ben'ka' billesh, na' wyaje' lo yaana' jelwille' Chioza'.

47 Na' ka gol, ba zej barkwa' gchol nido'na' na' stoz Jesúza' bgaane' gana' biza'n.

48 Na' ble'ile' le chllaglogaken' daa za' be'na' gana' zejləgake'. Na' ni bal wlo'e nez tlo nido'na' zeje' gana' ziyajlgake'. Na' ba zoa yidie' lawe'ka'

49 ka ble'gakile'ne' zeje' tlo nido'na' na' gokgakile' yel bxxenzan. Na' besyaagake'

50 daa le bllebɡake' daa ble'gakile'. Na' lii wnetie' legake', chi'e:

—Bi illeble, nad'kzan.

51 Na' biyep'e' loo barkwa' na' wche'lli be'na'. Na' le bibangakile',

⁵² la' aga ba wyajni'gakile' yel' waka' daa bene' che yetxtilka' daa gokgake' ben' lall'do' wal.

Jesúza' biyone' ben'ka' bi shao' gana' mbani Genesareta'

(Mt. 14:34-36)

⁵³ Na' ka biyoll wdegake' lo nisdona' na' bllingake' yell-lío daa mbani Genesareta', na' bda' barkw che'ka' yag cho'a nisdona'.

⁵⁴ Ka bchejgake' loo barkwa', lli biyombia'te ben' Genesaretka' Jesúza'.

⁵⁵ Na' wdadogake' doxen gana' mbani lalle'ka' btopgake' ben' bi shao', na' lo daazə nxoagake' legake' chjwa'gake' legake' gana' nezgakile' bllin Jesúza'.

⁵⁶ Na' gattezə chaje' laa yelldo'ka' laa yell xenka', wa laa ranshka', chyixjgake' ben'ka' bi shao' tneza' gana' chdie'. Na' chat'yogakile'ne' wi'e latj gox'gake' la'ch' xe'na'. Na' yog' ben'ka' gok bex'gake'n biyakgakile'.

7

Diika' chxinj chlenan yichjlall'do'chona'

(Mt. 15:1-20)

¹ Fariseoka' len zi bal ben'ka' chli' chsedi leya', ben'ka' zaak Jerusalenna', bllingake' lao Jesúza'.

² Na' ka ble'gakile' bal ben'ka' nak Jesúza' txen bi bixis biyib neeka' ka zi' gaogake', na' wdaogake' xya chegake'.

³ (La' fariseoka' len yog'z ben' Israelka' ni no-gake' daa bli' bsemi dii xozxtoe'ka' legake' nan bi gak gaogake' shi bin' yixis yiyib neeka'.

4 Na' ka chiyoll chajgake' lao yaana' shi bi yixis yiyib neeka' bi gak gaogake'. Na' lekzka' chixis chiyibgake' diika' cheej chaogakile'. Na' dii zanch diika' yoologake' chongake'.)

5 Na' fariseoka' len ben'ka' chli' chsedi leya' wñabgakile' Jesúza', che'gake':

—¿Biche bi chon ben'ki nako' txen ka bli' bsemi dii xozxto'choka' cho'?, la' bi chixis chiyib neeka' kat' cheej chaogake'.

6 Na' che' Jesúza' legake':

—Kwaslöl inlleban wñe dii Isaíaza' chele, le' ben' wxiye', kana' bzeje' daa na:

Ka nak ben'ki, de cho'a dill'zan choe'la'ogake' nad', na' aga choe'la'ogake' nad' do yichj do lall'gake'.

7 Bibi zjanayin chongake' ka choe'la'o nad'; na' daa chli' chsedgakile' nakan dii chyiljall'z ben'.

8 Na' le' chbej yichjle daa nllia Chioza' bia' gonle kwenche gonle daa chyiljall' ben' yell-lioni.

9 Na' lekzka' golle' legake':

—Chzoale ka'lə daa nllia Chioza' bia' gonle kwenche gonle daa bli' bsemi dii xozxto'leka' le'.

10 Moiséza' wne': “Li koo xaxña'lena' balaan”, na' “Beena' ine zban che xaxneena' chiyal' guete’.”

11 Na' le' choe'le latj yee ben' xaxneena': “Bi gak gaken' le', la' yog' dga de cha' ba ncheb' wi'an Chioza'.”

12 Na' daa nale ka', bich chonle byen gaken ben' xaxneena'.

13 Na' daa chonle ka', chzoale cho'a xtill' Chioza' ka'lə kwenche chonle daa bli' bsemi dii xozxto'leka' le'. Na' dii zanch ka dga chonle.

14 Na' w_ne Jesúza' yog' ben'ka' lle' na', na' golle' legake':

—Li wzenag dga inia' le', na' li shajniin:

15 Aga daa cheej chao ben' yell-lionin ch_xinj ch_lenan le'. San daa chalj chxe loo yichjlall'do'enan' ch_xinj ch_lenan le'.

16 Ka le' chenile dga nia', li sen w_neyi.

17 Na' ka bikwase' kwit ben'ka' lle' na' biyo'e loo yooná' gana' zoagake', na' ben'ka' nakgake'ne' txen w_nabgakile'ne' bi zejin daa golle' ben'ka'.

18 Na' golle' legake':

—¿Ani le' bi chajniilen? ¿Abi chajniile aga daa cheej chao be_naan ch_xinj ch_lenan le'?

19 La' aga loo yichjlall'do'enan' illinan, san loo li'enan' lljche'n, na'tech yichejan.

Na' daa golle' ka', zejin bittezə yel' wao wak yeej gaocho.

20 Na' lekzka' golle':

—Daa chchej loo yichjlall'do' ben' yell-lioni, lennan' ch_xinj ch_lenan le'.

21 La' loo yichjlall'do'ekan' chalj chxe diiki bi nak wen: yel' chza'lall' mal, yel' ch_nelen ljwellin, yel' chiyit ljwellin,

22 yel' wban, yel' wzelall', yel' wen dii mal, yel' wxiye', yel' wenlen kwerp cheyinna' daa bi nxe bi nzak', yel' xe', yel' wyilj wzan dill' che ben', yel' chep cha'lall', na' yel' n_{ch}ol_nnniti.

23 Yog'lol_l dii malki chalj chxegakan loo yichjlall'do' ben' na' ch_xinj ch_lengakan legake'.

*To noolə bi nake' ben' Israel ben_lilallee Jesúza'
(Mt. 15:21-28)*

24 Na' biza' Jesúza' gana' wzoe' na' ziyaje' gana' mbani yell Tírona' na'ch yell Sidónna'. Na' blline' to yoo na' bi goklallee no inēzin, per bi gok wkwashee.

25 Na' to noolə, beŋ' zoa to bi' nool che' yoob' dii xiwaa, ka wnezile' bllin Jesúza', lii wyajtje' jachek' xibe'na' lawe'na'.

26 Na' noola' nake' beŋ' griego, na' golje' gana' mbani Sirofeníciana'. Na' got'yoile' Jesúza' yibeje' dii xiwaa yoo bi' nool che'na'.

27 Na' goll Jesúza' le':

—Yog'zə beŋ' zigaate chwawe' xiine'ka'. La' bi nakan wen koyocho daa chao xiinchoka' na' wzal'chon lao bekw'ka'.

28 Na' che' noola' le':

—Lekzilo'n, beŋ' do', per bekw'ka' chbe'gakb xan mesa' na' chitopgakb blaaka' chxop.

29 Na'ch golle'ne':

—Ni che dillii ba bi'o, biyaj mbalaz. Ba bichej dii xiwaa yoo bi' cho'na'.

30 Na' ka billin noola' lille'na', ble'ile' bi' nool che'na' deb' lo blaga' na' ba bichej dii xiwaa wyoob'.

Biyon Jesúza' to beŋ' kwell na' bi chak inetie'

31 Na' biza' Jesúza' gana' mbani Tírona' na' bi-die' yell Sidónna' na' billine' gana' de nido' che Galileana', gana' mbani Decápoliza'.

32 Na' jwa'gake' lawe'na' to beŋ' kwell na' leyi bi cha'yen' inie', na' got'yogakile'ne' wxoa neena' yichje'na'.

33 Na' bche' Jesúza'ne' ka'lə gana' kono lle', na' bne' xbene'na' loo nague'na', na' bllaa xeneena' lo xbene'na', bshile'n lo loll' beena'.

34 Na' blis jalawe'na' cha'lə, wkaalallee, na' golle'ne':

—¡Éfata! —zejin: ¡Byalj!

35 Na' lii byaljte nague'na', na' gok bita lolleena' na' bishalje' wen.

36 Na' che' Jesúza' ben'ka' ble'i kono ye'gake' ka'. Na' la'kzi golle' legake' ka', zizikli bzegake'n dill'.

37 Na' le bibangakile', che'gake':

—Yog'lolte chak gon beeni, chiyone' ben'ka' bi cheni, na' ben'ka' bi chak ine, chone' ka chnegake'.

8

Jesúza' bwawe' tapa mil ben'

(Mt. 15:32-39)

1 Do kana', ben' zan inleeb bdop bllag. Na' daa bibi de yeej gaogake', wne Jesúza' ben'ka' nakgake'ne' txen chi'e legake':

2 —Chiyeshid' ben'ki, la' ba gok shon lla zoalengake' nad' na' bibi de yeej gaogake'.

3 Na' shi yiselaa legake' bi neej naogake', xoll ichol-lall'gake' tneza', la' balgake' za'gake' zit'.

4 Na' ben'ka' nakgake'ne' txen che'gake'ne':

—¿Gatg lljxi'cho dii gao yog' ben'ki?, la' gani lle'cho kono zoa wit' dii gaocho.

5 Na' che' Jesúza' legake':

—¿Ka'k' yetxtilka' noa'le?

Na' che'gake'ne':

—Gallan.

6 Na' bene' mandad kwe' ben'ka' lo yona', na' bexee gallte yetxtilka', na' ka biyoll bi'e Chioza' yel' choxken, na' boxje'n na' bi'en ben'ka'

nakgake'ne' txen kwenche chisgake' che che ben'ka'.

⁷ Na' lekzka' nox'gake' zto chop bel. Na' bi'e Chioza' yel' choxken, na' golle' ben'ka' nakgake'ne' txen we'gake' che che ben'ka'.

⁸ Na' yog'logake' weej wdaogake' axt ka beljagake' ile', na' bitopgake' zi gall xet' diika' bichoonan.

⁹ Ben'ka' weej wdao gokgake' ka tapa mil. Na' Jesúza' bisee legake'

¹⁰ na' bizee biyoolene' ben'ka' nakgake'ne' txen loo barkwa' na' ziyajgake' gana' mbani Dalmanútana'.

Fariseoka' goklall'gake' gon Jesúza' to yel' wak lawe'ka'

(Mt. 16:1-4; Lc. 12:54-56)

¹¹ Na' bllin fariseoka' na' wzologake' chakguedlengake' Jesúza'. Na' daa goklall'gake' wchixgake'ne', wnabgakile'ne' gone' to yel' wak lawe'ka' kwenche gakbia' shi Chioza'kzan bseleene'.

¹² Na' Jesúza' axt wkaalallee, golle':

—¿Berache le' zoale naa chnabzle gon' to yel' wak dii ile'ile'? Dii li nia' le', aga bi yel' wak gon' ile'ile'.

¹³ Na' bizee kwite'ka', na' biyo'e loo barkwa' sto shii ziyaje' shlaa nisdona'.

Dill' wxiye' che fariseoka' zaklebin levadúrana'

(Mt. 16:5-12)

¹⁴ Na' ben'ka' nak Jesúza' txen gol-lall'gake' wa'gake' yetxtil che'ka', na' tlish'chga dii noa'gake' loo barkw che'ka'.

¹⁵ Na' che' Jesúza' legake':

—Wsak'gale bi shajle'le dill' wxiye' che fariseoka' na' che Heródeza', daa zaklebi levadúrana'.

16 Na' ben'ka' nakgake'ne' txen che' l'jwellgake':

—Daa bi bi'acho yetxtilan' ne' ka'.

17 Na' gokbe'i Jesúza' dillaa choe'gake', na' golle' legake':

—¿Berache chakzile daa bi bi'ale yetxtilan' nia' ka'? ¿Abin' shajni'kzile' ni bin' gakbe'ile ka nak diika' chon'? ¿Abin' iyalj yichjlall'do'lenan'?

18 Zoate jalaoleka' na' bi chle'ile, na' zoate nagleka' na' bi chenile'. ¿Abi chjadinile ka ben'?

19 Kana' bxoxj' gay' yetxtilka' na' wdao ben'ka' gaya' mil, ¿bal' xet' diika' bichoonan'?

Na' gollgake'ne':

—Shllinan.

20 —Na' kana' bxoxj' gall yetxtilka' na' wdao ben'ka' tapa mil, ¿bal' xet' diika' bichoonan'?

Na' che'gake'ne':

—Zi gallan.

21 Na' che' Jesúza' legake':

—¿Ana' ni ka' bin' shajni'kzile'?

Jesúza' biyone' to ben' l'chol' yell Betsáidana'

22 Na' bllingake' yella' le Betsaida, na' ben'ka' lle' yella' jwa'gake' to ben' l'chol' lao Jesúza' na' got'yogakile'ne' gox'gache'ne'.

23 Na' bex' Jesúza' na' ben' l'chola' na' wleje'ne' yella'. Na' bllle' xeneena' jalawe'na' na' bxo' neena' yichje'na', na' wñabile'ne' shi ba chle'ile'.

24 Na' che' ben' l'chola':

—Chle'id' xonj'ben', na' nakgake' ka yag dii chza'.

25 Na' Jesúza' beḡee jalawe'na' sto shii, na' biyak-ile'. Na' ble'ile' kwaslōl yog'loḷte.

26 Na' bisel' Jesúza'ne' shḷicha lille'na', chi'ene':
—Bi lljayoo dill' yella'.

Pédrona' bi'e dill' Jesúzan' nake' Crístona'
(Mt. 16:13-20; Lc. 9:18-21)

27 Na' biza'len Jesúza' ben'ka' nakgake'ne' txen wyajgake' yellka' mbani Cesarea de Filípona'. Na' shlak ngoogake' nez, wḡabile' legake', chi'e:

—¿Non na ben' nak'?

28 Na' che'gake'ne':

—Balḡake' nagake' lin' dii Juanna', beena' bchoa ben' nisa', na' zi balḡake' nagake' lin' Elíaza', na' zi balḡake' nagake' nako' sto ben' wdixjee daa goll Chioza'ne' kani'yi.

29 Na' chi'e legake':

—Shera le', ¿nora nale nak'?

Na' che' Pédróna':

—Lin' Crístona', beena' nḡheb Chioza' wselee.

30 Na' che' Jesúza' legake' kono ye'gake' ka'.

Jesúza' cho'e dill' guete'
(Mt. 16:21-28; Lc. 9:22-27)

31 Na' wzolo Jesúza' bli' bsdile' legake' nan le', Ben' Bsel' Chioza' Yell-lioni, chonan byen sak'zi'e dii xen, na' ben' golka' chḡabia' na' bḡozka' chḡabia' na'ch ben'ka' chli' chsedi leya' gakzbangakile'ne', na' chonan byen witgake'ne' na' yibane' ka gak shōḡlla.

32 Na' bshaljlene' legake' kwaslōl daa gak che'. Na'ch wlej Pédróna'ne' ka'lə na' wzolo golle'ne' bi koo cho'e daa.

33 Na' biyechj Jesúza' chwie' beŋ'ka' nakgake'ne' txen, na' bsheshlene' Pédrona', chi'ene':

—jKwas ka'lə, Satanás!, la' bi chajniilo' daa cheeni Chioza' gone', san de yell-liozan chajniilo'.

34 Na' wŋe Jesúza' beŋ'ka' nakgake'ne' txen len beŋ'ka' lle' na', na' chi'e:

—Shi no cheeni gake' nad' txen, chiyal' wsanlall' kwine' na' izanile' yel' mban che'na' yen ile'ile' bittez ni cha', na' gone' ka chazlallaa.

35 La' beena' bi chzanile' yel' mban che'na', beenan' kwiayi', san beena' chzanile' yel' mban che'na' ni cha' na' ni che dill' wen dill' kob cha'na', beenan' gat' to yel' mban che' zejli kaŋi.

36 Bibi zjanayin gap beŋ' yog'lol daa de yell-lioni, shi le' kwiayee.

37 Na' aga zakii chixje' kwenche yisla yel' mban che'na'.

38 Nottezə beena' chido'i wchebe' nombi'e nad' wa wi'e cho'a xtilaana' lao beŋ' saaxyaka' beŋ'ka' bi chonlilall' nad', ka'kzə nad', Ben' Bsel' Chioza' Yell-lioni, yiyii yido'id' le' kat' yiyedlen' anjl cha'ka' na' zinsa' balaan xen che Xa' Chioza'.

9

1 Na' lekzka' golle' legake':

—Dii li nia' le', bal-le lle'leni, ni mbanle ile'ile ka chnabia'len Chioza' yel' wak xen che'na'.

Jesúza' biyake' nlla'lə

(Mt. 17:1-13; Lc. 9:28-36)

2 Wde xop lla, Jesúza' wyaje' to lo yaa sibə, na' bchi'e Pédrona', Jacóbona' na'ch Juanna'. Na' lawe'ka' biyake' nlla'lə.

³ Na' xe'na' axt chep cheeni'n, na' biga zoa beṅ' chibe'n xtil inleeb ka gokan.

⁴ Na' ble'gakile' Elíaza' na'ch dii Moiséza' chshaljlengake' Jesúza'.

⁵ Na' che' Pédrona' Jesúza':

—Maestro, iwen inleeb zoacho ni! Gonnto' twej ransh chele, to cho', to che dii Moiséza', na' sto che Elíaza'.

⁶ Kon bi billet-lallee golle', daa chleebchgagake'.

⁷ Na' wze to bej bkwashaan legake', na' loo beja' wṅe Chioza', chi'e:

—Beenin xiṅṅaa, na' le chakidee. Li wzenag che'.

⁸ Na' ka bwiagake' gana' wle' beṅ'ka' shoṅ, stoz Jesúza' ze.

⁹ Na' shlak chiyetjgake' lo yaana', goll Jesúza' legake' kono ye'gake' daa ble'gakile' axt kat'ch le', Beṅ' Bsel' Chioza' Yell-lioni, ba bibane' ladj beṅ' wetka'.

¹⁰ Na' daa golle' ka', ni to kono beṅ' yoblə goll-gake' daa ben ble'gakile', la'kzi wṅabi ljwellgake', bi zejṅ daa golle' yibane' ladj beṅ' wetka'.

¹¹ Na' wṅabgakile' Jesúza', che'gake'ne':

—¿Biṅhe naz beṅ'ka' chli' chsedi leya' nan zigaate Elíazan' yiyed?

¹² Na' chi'e legake':

—Dii li, Elíaza' yide' zigaate yidgwee xṅezi yog'loṅte. ¿Abi ṅezile biṅhe Cho'a Xtill' Chioza' nan Beena' Bsel' Chioza' Yell-lioni chonan byen sak'zi'chgue' na' gakzbani beṅ' le'?

¹³ Na' nia' le', ba biyed Elíaza', na' bengakile'ne' daa nazan chegake', kon ka na Cho'a Xtill' Chioza' gongake' che'.

Biyon Jesúsza' to bi'yoo dii xiw'
(Mt. 17:14-21; Lc. 9:37-43)

14 Na' ka billingake' gana' lle' beṇ'ka' sto, beṇ'ka' nakgake'ne' txen, na' ble'gakile' lle' beṇ' zan in-leb kwite'ka', na' len baḷ beṇ'ka' chli' chsedi leya' chakguedlengake' legake'.

15 Na' beṇ'ka' lle' na' ka ble'gakile' Jesúsza', biban-gakile' na' wza'dogake' jawapgake'ne' chiox.

16 Na' chi'e legake':

—¿Bi cheyin chakguedlenile beṇ'ka'?

17 Na' to beena' len ladj beṇ'ka' lle' na' chi'ene':

—Maestro, ni ba nchi'a bi' cha'ni lawo'ni, la' yoob' to dii xiw' na' chllonan ineb'.

18 Gattezə chdab' dii xiwaa choxa'n leb' na'ch chchoonān leb' lo yona'. Na' chbia bllin' cho'abaa, na' chaoxaxj leybaa na' chzecha kwerp che'baa. Na' ba gosh' beṇ'ki nako' txen yibejgake' dii xiwaa yoob', per bi chakgake'.

19 Na' che' Jesúsza' legake':

—¡Le' beṇ' bi chajle'! ¿Zi' ka'k'tek chiyal' soalen' le'? ¿Zi' ka'k'tek chiyal' soid' le'? Li lljxi'shkib' ni.

20 Na' jwa'gake'b' lawe'na'. Na' ka ble'i dii xiwaa Jesúsza', benan ka wyazb' shona'. Na' billeeb' lo yona' na' wbiḡ wtolb' na' wllia bllin'na' cho'abaa.

21 Na' wṇabi Jesúsza' xabaa, chi'e:

—¿Batrate wzolo chakb' ki?

Na' che' xabaa:

—Kana' nakteb' bi'do' chakb' ka'.

22 Na' zan shii ba bzal' dii xiwaab' lo yi'na' na' loo nisa' kwenche witan leb'. Na' shi wak yiyono'b', biyesh'lall'gachi neto' na' goklengach neto'.

23 Na' che' Jesúsza':

—¿Biche nazo' shi wak'?, la' beena' chonlilall' Chioza' aga bi dii lallj gat' che'.

²⁴ Na' besyaa xabaa, chi'e:

—Chonlilallaane'. ¿Goklen nad' gonlilall'chee!

²⁵ Na' ka ble'i Jesúza' ba chdop chllag ben' zan inleeb, na' bsheshlene' dii xiwaa, chi'en:

—Dii xiw', lin' chono' kwenche bi cheni bi'ni ni bi chak ineb', nad' nia' li', bichej, na' bich gak yiyoo sto shii.

²⁶ Na' besyaa dii xiwaa, na' bxizan leb' zibia' wal na' bichejan, na' gotb' ka bi' wet. Na' ben' zan wngake': "Ba wib'."

²⁷ Na' beX' Jesúza' na'ba' kwenche bisolleeb'.

²⁸ Na' ka biyoo Jesúza' to loo yoo, ben'ka' nakgake'ne' txen wñabgakile'ne' to lezgake', che'gake':

—¿Berache bi gok yibejnto' dii xiwaa?

²⁹ Na' chi'e legake':

—Kwenche gak yichej dii xiw' ka dga, chiyal' soale wbas' na' we'lwill-le Chioza'.

Jesúza' sto shii cho'e dill' guete'

(Mt. 17:22-23; Lc. 9:43-45)

³⁰ Na' biza'gake', na' bidegake' gana' mbani Galileana'. Na' Jesúza' bi goklallee no inezi gan zoagake'

³¹ daa chzajniile' ben'ka' nakgake'ne' txen. Na' chi'e legake':

—Nad', Ben' Bsel' Chioza' Yell-lioni, gon ben' nad' lo na' ben' malka' na' witgake' nad', na' ka gak shon lla, yiban' ladj ben' wetka'.

³² Na' bi wyajni'gakile' daa chi'e legake', na' bi biyaxjgakile' inabgakile'ne' biche che'ze' ka'.

¿Noran zak'chi?

(Mt. 18:1-5; Lc. 9:46-48)

³³ Na' billingake' yell Capernaúma'. Na' ka billingake' gana' zoagake', na' chi'e legake':

—¿Bi cheyin chakguedzle shlak zingoocho neza'?

³⁴ Na' ni togake' bi wne, daa gokguedgake' che noyen'gaken' nak ben' zak'chi.

³⁵ Na' wche' Jesúza' na' goxe' ben'ka' shllin, chi'e legake':

—Shi nole cheenile gakle ben' zakii, chiya! gon kwınle ka wen llin che ben'.

³⁶ Na'ch bzoe' to bi'do' ladje'ka'. Na' blene'b' chi'e legake':

³⁷ —Nottezə ben' wlebe' to bi'do' ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'.

Beena' bi chakzbani cho', txenkzan nake' cho'

(Lc. 9:49-50; Mt. 10:42)

³⁸ Na' che' Juanna' le':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben' na' bllonnto' gone' ka', la' bi nake' cho' txen.

³⁹ Na' che' Jesúza':

—Bi wllonle gone' ka', la' beena' chzetj lia'na' kwenche chone' yel' wak, aga wak inie' zban cha'.

⁴⁰ La' beena' bi chakzbani cho', txenkzan nake' cho'.

⁴¹ Na' nottezə beena' gone' le' la'ch' lat' nis yeejle daa nakle nad' txen, dii li nia' le', de dii si'e banez.

Diika' gon ka ibixcho lao dii mala'

(Mt. 18:6-9; Lc. 17:1-2)

⁴² 'Nottezə beena' gon ka ibix̄ to ben̄' zi' chzolo chon̄lilallee nad', naklan wen wwal'gake' yene'na' to yaj che molinna' na' lljazal'gake'ne' loo nido'na' aga ka daa gone' ka ibix̄ ben̄' lao dii mala'.

⁴³ Na' shi noona' chonan ka ibix̄o' lao dii mala', bchogan. Wenchlan bi de noona' t̄laa yillino' kwit Chioza' aga ka daa yiyaj doxentio' lo yi' gabīla' daa biga yiyol,

⁴⁴ gana' ni bzogaa bi chet ni biga chiyol yi'na'.

⁴⁵ Na' shi ni'ona' chonan ka chono' to dii mal, bchogan. Wenchlan bi de ni'ona' t̄laa yillino' kwit Chioza' aga ka daa yiyaj doxentio' lo yi' gabīla',

⁴⁶ gana' ni bzogaa bi chet ni biga chiyol yi'na'.

⁴⁷ Na' shi jalawo'na' chonan ka chono' to dii mal, wlejan. Wenchlan bi de jalawo'na' t̄laa yillino' gana' zoa Chioza' ch̄nabi'e aga ka daa yiyaj doxentio' lo yi' gabīla',

⁴⁸ gana' bi chet bzogaa ni biga chiyol yi'na'.

⁴⁹ 'Ka yog'te diika' chzangakile' choe'gake' Chioza' chgoogake'n zed', ka'kzan yog'te ben̄'ka' non̄lilall' nad' yen ile'gakile' yel' zak'zi'na' yell-lioni.

⁵⁰ Zedaa nakan dii wen, per shi bich nakan zxi', aga wakch yiyonchon zxi' dii yoblə kwenche wchinchon. Chiyal' soalen ljwell-le mbalaz, na' shi gonle ka', nakle ka yel' wao daa yoo zed' na' sian.

10

Bi chiyal' yilaa ben̄'ka' nshagna'

(Mt. 19:1-12; Lc. 16:18)

¹ Biza' Jesúsza' Capernaúma' ziyaje' gana' mbani Judeana' na' lo yell-liona' daa de sh̄laa yao

Jordánna'. Na' bizdi'a bizllag beṇ' zan lawe'na' na' wzoloe' chli' chsedile' legake' kon ka ba yooloe' chone'.

² Na' bal' fariseoka' wbig'gake' lawe'na', na' kwenchezə wchixgake'ne' wṇabgakile'ne' shi de lsens yilaa xool beṇ'.

³ Na' chi'e legake':

—¿Bin bllia dii Moiséza' bia' gonle?

⁴ Na' che'gake'ne':

—Dii Moiséza' bi'e latj yichoon beṇ' byona' xoolo'na' na' wi'ene' to yish daa cho'e dill' ba bilaa-gake'.

⁵ Na' che' Jesúza' legake':

—Dii Moiséza' bllie' bia' gonle ka' daa nakle beṇ' widenag.

⁶ Per dii nech ka wxe wzil yell-lioni, Chioza' “bene' beṇ' byona' na'ch noola'.”

⁷ “Daan, beṇ' byona' wlee xaxneena' kwenche soalene' xoolo'na'

⁸ na' gakgake' toz.” Na' bich nakgake' chop, san ba nakgake' toz.

⁹ Na' beṇ'ka' ba non Chioza' toz, ni to beṇ' yell-lio bi chiyal' yilee legake'.

¹⁰ Ka billingake' yoona' gana' zoagake', beṇ'ka' nakgake'ne' txen wṇabgakile'ne' cheyi daa golle' ka'.

¹¹ Na' che' Jesúza' legake':

—Beena' yilee nool che'na' na' yishagnee nool yoblə, chone' ka beena' zoakzə nool che' na' chda-lene' nool yoblə.

¹² Na' shi noola' yilee beṇ' che'na' na' yikee beṇ' yoblə, chone' ka beena' zoakzə beṇ' che' na' chda-lene' beṇ' yoblə.

Jesúza' chonleeye' bi'do'ka'

(Mt. 19:13-15; Lc. 18:15-17)

¹³ Na' bal ben' jwa'gake' bi'do' che'ka' lao Jesúza' kwenche wxōa neena' yichjb'ka' na' gonleeye' legakb'. Na' ben'ka' nakgake'ne' txen wzologake' chsheshlengake' ben'ka' zjwa' bi'do'ka'.

¹⁴ Na' ka ble'i Jesúza' chsheshlengake' ben'ka', blee na' chi'e legake':

—Li we' latj yid bi'do'ki lawa'ni, bi wllonle, la' Chioza' chnabi'e loo yichjlall'do' ben'ka' nak ka legakb'.

¹⁵ Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

¹⁶ Na' blene' bi'do'ka', na' bxōa neena' yichjb'ka' na' benleeye' legakb'.

To bi' wew', bi' wni'a, bshaljlem' Jesúza'

(Mt. 19:16-30; Lc. 18:18-30)

¹⁷ Ka ba chiza' Jesúza' yigwee nez, blindo to bi' wew' bchek' xibbaa lawe'na' che'bee:

—Maestro, li' nako' ben' wen. ¿Beran chiya' gon' kwenche gat' to yel' mban cha' zejli ka'ni?

¹⁸ Na' che' Jesúza' leb':

—¿Berache nazo' nad' ben' wen? Toz Chioza' nake' ben' wen.

¹⁹ Ba nezczilo' daa nllia Chioza' bia' goncho: “Bi wito' ben', bi soaleno' nool bi nak nool cho', bi kwano', bi chiljalloo bizə gon ino' che ben', ni bi siyoo, na' wdap balaan xaxnoo.”

²⁰ Na'ch che'bee:

—Maestro, kana' naktia' bi' xkwid' chon' yog' diika'.

²¹ Na' bwia Jesúza' leb' kon yel' chaki, chi'e:

—Stozə daa chyallj gono': jayet' yog' dii de cho' na' be'n beṇ' yesh'ka', na' gat' to yel' shao' cho' yabana'. Na' da dino' nad'.

²² Na' gokyeshii bi' wni'ana' ka golle'b' ka'. Na' ziyajb' chakyeshib' daa nakb' bi' wni'a xen inleeb.

²³ Na' bwia Jesúza' beṇ'ka' lle' na', na' chi'e beṇ'ka' nakgake'ne' txen:

—ǰLallj inleeb chonan che beṇ' wni'aka' we'gake' latj inḡabia' Chioza' legake'!

²⁴ Na' bibani beṇ'ka' nakgake'ne' txen daa golle' ka'. Na' chizi'e legake':

—Le' xiindawaa, chonan lallj che beṇ' wni'ana' yilline' yabana' gana' chṇḡabia' Chioza'.

²⁵ Lobe'ch te to kamey to xan yesh' aga ka to beṇ' wni'a yilline' yabana' gana' chṇḡabia' Chioza'.

²⁶ Ka bengakile' golle' ka', zizikli bibangakile', na' che' ljwellgake':

—ǰNotg gak yillin lao Chioza', shka'?

²⁷ Na' bwia Jesúza' legake' chi'e:

—Ni to beṇ' yell-lío bi gak gone' dga, per Chioza' aga bi dii lallj che' de, la' yog'lolte chak gone'.

²⁸ Na' Pédrona' chi'ene':

—Neto' ba wlej yichjnto' yog'lol dii napnto' kwenche nonnto' li' txen.

²⁹ Na' che' Jesúza':

—Dii li nia' le', nottezə beṇ' ba bzanile' no lille', no xaxṇee, no beṇ' bishee, no beṇ' zane', no xiin xoole', no yell-lío che' ni cha' nad' na' ni che dill' wen dill' kob cha'na',

³⁰ lo yell-lioni Chioza' yiyo'ene' dii zanch ka diika' wlej yichje', no lille', no beṇ' bishee, no beṇ' zane', no xiine', no yell-lío che' la'kzi chiya dii

wsak'zi' beṅ' le', na' illin lla gat' to yel' mban che' zejli kaṅi.

³¹ Per beṅ' zan nakgake' beṅ' zakii ṅaa, wllin lla bich bi sak'gake', na' beṅ' zan bi nakgake' beṅ' zakii, wllin lla gakgake' beṅ' zakii.

De wyon shii Jesúza' cho'e dill' guete'
(Mt. 20:17-19; Lc. 18:31-34)

³² Ka ziyajgake' Jerusalénna', na' zillialo Jesúza' lao beṅ'ka' nakgake'ne' txen. Na' le chibangakile', na' beṅ'ka' zinoch le' le chllebgake'. Na' bche' Jesúza' beṅ'ka' shllin ka'lə na' wzoloe' cho'e dill' lawe'ka' daa gag che',

³³ chi'e legake':

—Ba gokbe'kzile' ba ziyajcho Jerusalénna', na' nad', Beṅ' Bsel' Chioza' Yell-lioni, gongake' nad' lo na' b̄xozka' ch̄ṅabia' na' beṅ'ka' chli' chsedi leya', na' wchoglogake' cha' guet' na' gongake' nad' lo na' beṅ' zit'ka'.

³⁴ Na' wtitjgakile' nad', na' wlla' xeneeka' nad', na' wit chingake' nad', na' witgake' nad'. Na' ka gag shon lla yiban' ladj beṅ' wetka'.

To dii wṅab Jacóbona' len Juanna' lao Jesúza'
(Mt. 20:20-28)

³⁵ Na' Jacóbona' len Juanna', beṅ'ka' nak xiin Zebedewa', wbig'gake' lao Jesúza' che'gake'ne':

—Maestro, cheeninto' gongacho' goklen gono' dga inabinto' li'.

³⁶ Na' chi'e legake':

—¿Beran cheenile' gon' chele?

³⁷ Na' che'gake'ne':

—We'gacho' latj kwe'nto' sh̄laa wej kwito'na' kat' solo inabi'o gana' de balaan xen cho'na'.

38 Na' che' Jesúza' legake':

—Aga neꝓzile' bin chꝓable. ¿Awzoile' wtiꝓ-le ka yeꝓ' zak'zi'ka' idiꝓ illag' na' gak chele ka gak cha'?

39 Na' che'gake'ne':

—Wzointo'n.

Na' che' Jesúza' legake':

—Dii li, wtiꝓ-le ka yeꝓ' zak'zi'ka' idiꝓ illag' na' gak chele ka gak cha'.

40 Per daa nale kwe'le shꝓaa wej kwitaa bi nak lo na' gona'n, san beꝓ'ka' ba mbej Chiozan', gakan chegake'.

41 Ka beni beꝓ'ka' zi shi, na' bllaagake' Jacóbona' na'ch Juanna'.

42 Na' wꝓe Jesúza' legake', chi'e:

—Neꝓzkzile beꝓ'ka' chꝓabia' yell-lioni na' beꝓ'ka' zakii chongake' byen chzenag beꝓ' chegake'.

43 Per aga kan' chiyaꝓ' gonle. Shi nole cheenile gakle beꝓ' mbejlawin chiyaꝓ' gon kwinle ka wen llin che beꝓ'.

44 Na' shi nole cheenile gakle beꝓ' zakii, chiyaꝓ' gakle ka beꝓ' ndoo lla yel chone' xshin beꝓ'.

45 La' nad', Beꝓ' Bsel' Chioza' Yell-lioni, aga bid' kwenche gaklen beꝓ' nad', san bid' kwenche gaklen' beꝓ' na' wi'a yeꝓ' mban cha'na' kwenche yisla' beꝓ' zan lao saaxyana'.

Jesúza' biyone' beꝓ' lchoꝓa' le Bartimeo

(Mt. 20:29-34; Lc. 18:35-43)

46 Na' bllingake' Jericóna', na' ka ba chichej Jesúza' yella' kon beꝓ'ka' nakgake'ne' txen na' len beꝓ' zanch zinogake'ne', na' chi' to beꝓ' lchoꝓ cho'a neza' cheenile' no we' le' mech, na' lie' Bartimeo, xiꝓ to beꝓ' le Timeo.

47 Na' ka benile' nan Jesús, ben' Nazaretan', wdena', na' wzoloe' chosyee, chi'e:

—¡Jesús, xiin dia che dii Daví, biyesh'lall'gachi nad'!

48 Na' ben' zan bsheshlengake'ne' daa chosyee, na' zizikli chosyaache', chi'e:

—¡Xiin dia che dii Daví, biyesh'lall'gachi nad'!

49 Na' wlez Jesúsza' chi'e:

—Li inie'.

Na' wnegake'ne', che'gake':

—Btiplaloo, wzolla', ba chnie' li'.

50 Na' bzalee ka'lə lechaa nxoə kolleena' na' wzollee jsie' lao Jesúsza'.

51 Na' wnable'ne', chi'e:

—¿Bin cheenilo' gon' cho'?

Na' che' ben' lchola'ne':

—Maestro, cheenid' ile'id'.

52 Na' che' Jesúsza'ne':

—Wak yiyajo'. Daa ba benlilaloo nad', ba biyak-ilo'.

Na' katena' lii ble'teile' na' wnoe' Jesúsza'.

11

Ka billin Jesúsza' Jerusalénna'

(Mt. 21:1-11; Lc. 19:28-40; Jn. 12:12-19)

1 Ka ba zoa yillingake' Jerusalénna', na' wdegake' gaozə gana' lliá yell Betfagéna' na' yell Betániana', kwit Yaa Olívoza', na' Jesúsza' bselee chop ben'ka' nakgake'ne' txen,

2 chi'e legake':

—Li shaj yella' daa lliá gaozə, na' ka illinle na', ile'ile to burr chbando', ba konoñ' kwia, da'b yaga'. Na' wsell-leb wche'leb nilə.

³ Na' shi no inaz le': "¿Berache chsellzleb?", na' ye'lene': "Xanchonan' chyalljile'b xtit, na' yiyontie'b."

⁴ Na'ch wyaj ben'ka' bselee, na' ble'gakile' to burr da'b to cho'a yoo gana' chde neza', na' bsellgake'b.

⁵ Na' ben'ka' lle' na' wñabgakile' legake':

—¿Bin chonle? ¿Biçhe chsellzleb?

⁶ Na' gollgake' legake' daa goll Jesúza', na' be'gake' latj bche'gake'b.

⁷ Na' bxoagake' xe'ka' koll' burra' na' jasangake'b lao Jesúza', na' wllie'b.

⁸ Na' ben' zan bshiljgake' xe'ka' tneza', na' zi bale' bchoggake' no zin na' wdixjgake'n tneza'.

⁹ Na' ka ben'ka' llialo lao Jesúza' ka ben'ka' no-gake'ne', chosyaagake', nagake':

—¿Li we'la'o Chioza! ¿Gonleeyshga Xancho Chioza' beeni ba bselee!

¹⁰ ¿Gonleeyshga Xancho Chioza' ye'l' wñabia' che beeni zee lo dia che dii xozxto'cho Davina! ¿Li da we'la'ocho Chioza' zoa yabana'!

¹¹ Na' wyoo Jesúza' yell Jerusalénna' na' zeje' gana' zoa yoodo'na'. Na' ka biyoll bwie' doxenten na' ziyaje' Betániana' len ben'ka' shllin, daa ba wlle'.

*Bllaa Jesúza' daa bibi dii zix llia yag yixwewa'
(Mt. 21:18-19)*

¹² Na' betiyo ka biza'gake' Betániana', wdon Jesúza'.

¹³ Na' zit'lə ble'ile to yag yixwew llia xlaguinna', na' jawie' shi lekzka' llia yixwewa'. Na' ka blline' zeelo xlaguinna' llia, la' aga tiemp che yixwew kana'. ¹⁴ Na'ch golle' yaga':

— ¡Batch kwio' dii gao beṅ'!
Na' beni beṅ'ka' nakgake'ne' txen ka golle'n.

Jesúza' bisheshe' beṅ'ka' chit' chde lesh' chyoodo'na'

(Mt. 21:12-17; Lc. 19:45-48; Jn. 2:13-22)

¹⁵ Na' ka billingake' Jerusalénna', Jesúza' wyo'e lesh' chyoodo'na' na' wzoloe' bishesh biḱheene' beṅ'ka' chit' chde na' beṅ'ka' cha'o chzi'. Na' bishi'e mes che beṅ'ka' chshaa mecha' na' bzoles bzolline' gana' chi' beṅ'ka' chit'gake' palomka'.

¹⁶ Na' bi bi'e latj no sho'lench dii wit' wdie' lesh' chyoodo'na'.

¹⁷ Na' wzoloe' chli' chsedile' beṅ'ka' lle' na', chi'e:

—Cho'a Xtill' Chioza' nan: “Lilla'na' nakan ga choe'lwill yog'te beṅ' lle' doxen lo yell-lioni nad’”, per le', ba nonzlen ka to ga chdop chillag wban.

¹⁸ Na' ka beni bḱozka' chṅabia' na' beṅ'ka' chli' chsedile' leya' ka wne', wzologake' wdiljlall'gake' nak gongake' witgake'ne', daa le chllebgake'ne', la' yog' beṅ' chibangakile' ka chli' chsedile' legake'.

¹⁹ Na' ka gol, biza'len Jesúza' beṅ'ka' nakgake'ne' txen Jerusalénna'.

Wbill yag yixwewa'

(Mt. 21:20-22)

²⁰ Na' betiyo shzila' ka wdegake' gana' zoa yag yixwewa', ble'gakile' ba wbill axt loinna'.

²¹ Na' jadini Pédróna' daa goll Jesúza' yaga' na' chi'ene':

—Maestro, bwiakachi, yag yixwewa' daa bsheshleno'. Ba wbillan.

²² Na' che' Jesúza' legake':

—Li gonlilall' Chioza'.

23 Dii li nia' le, nottezə beena' yee yaani: “Bkwās ka'lə na' jsoa loo nido'na”, na' bi gonçhoplallee, san shajli'e, na' gak ka in'e'.

24 Daan nia' le', bittezə inable kat' we'lwill-le Chioza', li shajle' ba nakkzan gone'n, na' ikaalen.

25 Na' kat'ka' choe'lwill-le Chioza', li si'xen che bish' ljwell-lena' shi bi chone' chele kwenche Xalena' beena' zoa yabana' si'xene' saaxya cheleka'.

26 La' shi le' bi si'xen che ljwell-le, lekzka' Xalena', beena' zoa yabana', bi si'xene' saaxya cheleka'.

Yel' wnabia' che Jesúza'
(Mt. 21:23-27; Lc. 20:1-8)

27 Na' billingake' Jerusalenna' sto shii, na' shlak chda Jesúza' lesh' chyoodo'na', wbig' bxožka' chnabia', len beŋ'ka' chli' chsedi leya' na' beŋ' golka' chnabia',

28 na' che'gake'ne':

—Wnashki neto', ¿nora lsens cheyi chono' diiki?
¿No beŋ' li' yel' wnabia'na' kwenche chono' diiki?

29 Na' che' Jesúza' legake':

—Lekzka' nad', de to dii inabid' le'. Na' shi le' inale nad' daa inabid' le', na' inia' le' no lsens cheyin chon' yog' diiki.

30 ¿Noran bsel' Juanna' kwenche bidchoe' beŋ' nisa'? ¿AChiozan' bseleene', anti beŋ' yell-liona'zan? Li inashki nad'.

31 Na'ch choe'len ljwellgake' dill', che'gake':

—Shi ye'chone' Chioza' bseleene', lobe' in'e' cho':
“¿Berache ki wyajle'le che', lla?”

32 Na' bite gak yize'chone' nozə beŋaan bseleene'.

Bi biyaxjgakile' ye'gake'ne' ka' daa bllebgake' beṅ' yellka', la' yog'zgake' yoo yichjgake' Juanna' goke' to beṅ' wdixjee daa goll Chioza'ne'.

³³ Na' gollgake' Jesúza':

—Bi nezinto'.

Na' che' Jesúza' legake':

—Lekzka' nad', bi inia' le' no beṅ' nad' yel' wṅabia'na' chon' diiki.

12

Jempl che wen llinka' beṅ'ka' nak beṅ' mal
(Mt. 21:33-46; Lc. 20:9-19)

¹ Na' wzolo Jesúza' bseesile' legake' to jempl, chi'e:

—To beṅ' biyaze' yag uva. Na' wlo'en leeja', na' benschawee gana' wsigake' uvaka', na' bene' to yoo sibə, gana' kwia beena' gap wwie'n.

'Na'tech bene'n lo na' to chop beṅ' na' wzee zeje' zit'. ² Na' ka bllin lla yishibgake' uvaka', bselee to wen llin che'na' lao beṅ'ka' chap yag uvaka' kwenche lljaxi'e daa chidolee.

³ Per beṅ'ka' beṅ'gake' wen llin che'na', na' bet wdingake'ne' na' bilaggake'ne' to ka che'.

⁴ Na' xan yag uvaka' bselee sto wen llin che' lawe'ka', na' blaagake' yichje'na', na' chiya dii bengakile'ne'.

⁵ Na'ch bselee stoe', na' betgake'ne'. Na'tech bselee zanch beṅ' yoblə; na' balgake' bengakile' zibia', na' zi balgake' betgake'.

⁶ 'Na' ni chgaan bi'na' nakyen' xiine', bi'na' le chakile'. Na' bseleeb', la' gokile': “Wapgake' balaan bi' cha'ni.”

7 Na' ben'ka' nak lo na'gake' yag uvaka' che' ljwellgake': "Bi'nin gaki cheb' dga chapcho. Li da witchob', na' gakin checho."

8 Na' bex'gake'b' na'ch betgake'b' na' bibejgake' kwerp chebaa gana' lle' yag uvaka'.

9 Na' wnabi Jesúza' legake':

—¿Beraka chakile gon xan yag uvaka'? De de shaje' na' lljete' ben'ka' na' yiyone' yell-lío che'na' gana' lle' yag uvaka' lo na' ben' yoblə.

10 ¿Abigan' wlable Cho'a Xtill' Chioza'?, gana' na: Yaja' daa bi wyoolall' wen yooka', leyen'lannan' yaja' daa ba nchejcha yoona'.

11 Dgan ben Xancho Chioza' na' nakan to dii yibanicho.

12 Na'ch goklall'gake' gox'gake' Jesúza' daa gokbe'gakile' bchine' jempla' daa bi chajle'gake' che'. Per daa chllebgake' ben'ka' ndop nllag, biza'gake' bibi bengakile'ne'.

Janabgakile' Jesúza' shi chiyal' chixjgake' daa chnab ben' Rómaka'

(Mt. 22:15-22; Lc. 20:20-26)

13 Na' bsel'gake' lao Jesúza' bal' fariseoka' na' zi bal' ben'ka' nak Heródeza' txen, kwenchezə kwejyelgakile'ne' na' lljadaogake' xya che'.

14 Na' wyajgake' lawe'na', che'gake'ne':

—Maestro, nezinto' dillaa choo nakan dii li. Na' biga chshoo cho'a xtilloona' lao nottez ben', la' bi chwio' shi no nakgake'. San chli'o nez li che Chioza' kon ka nakan. Wnashki neto': ¿Achiyal' chixjcho daa chnab beena' chnabia' Rómána', anti bi chiyal' chixjchon?

15 Na' gokbe'i Jesúza' aga do lall'gake'n che'gake'ne' ka', na'ch chi'e legake':

—¿Berache chyiljlall'zle wchixle nad'? Li gonshki ni to mech kwenche ile'ida'n.

16 Na' be'gake'ne'n, na' che' Jesúza' legake':

—¿Nora cho'alawin na' no lein da' lee mechí?

Na' che'gake'ne':

—Che beena' chñabia' Rómanan'.

17 Na' che' Jesúza' legake':

—Na'len li we' beena' chñabia' Rómana' daa naki che', na' lekzka' li we' Chioza' daa naki che'.

Na' le bibangakile' daa golle' legake'.

Wnabgakile' Jesúza' nak gak kat'yiban ben' wetka' (Mt. 22:23-33; Lc. 20:27-40)

18 Na' wyaj bal' saduceoka' lao Jesúza'. Na' daa nagake' bich yiban ben' wetka', wnabgakile'ne' dga:

19 —Maestro, ley daa bzej dii Moiséza' nan shi to ben' byo guete' na' yigaan xoole'na' wizeb na' kono xiingake' wzoa, ben' bisheena' chiyal' yikee nool wizeba' kwenche soa xiin dia che dii ben' bisheena'.

20 Na' to shii wzoa gall bish' ben'. Na' ben' necha' bshagnee, na' wite' na' kono xiine' wzoa.

21 Na' ben' wchopina' bikee noola', na' lekzka' wite' na' kono xiine' wzoa. Na' ka'kzə gok che ben' wyonina'.

22 Na' gall bish'te ben'ki wzoalengake' noola' na' kono xiingake' wzoa. Na' ka wde wit yog'lolgake', lekzka' wit noola'.

23 Na' kat' yiban ben' wetka', ¿norayen'en' gak ben' che noola', lla? la' gall bish'tegaken' wkaa-gake'ne'.

24 Na' che' Jesúza' legake':

—Nakllejzilen, daa bi nombia'le Cho'a Xtill' Chioza' ni yel' wak che'na'.

²⁵ Kat'ka' yiban beṇ' wetka', koch no ikaa ljwellin, ni koch no wit' wde xiṇin, san yiyakgake' ka anjlka' lle' yabana'.

²⁶ Na' ka nak daa yiban beṇ' wetka', ¿abin' wlable daa bzej dii Moiséza' gana' cho'en dill' che yagdo'na' chal', na' goll Chioza' dii Moiséza': “Nadaan Chios che Abrahama', Isaaca', na'ch Jacoba'”?

²⁷ Na' bi nake' Chios che beṇ' wet, san nake' Chios che beṇ' ban. Dii xen inleeb nakllejile.

*Daa llialach lao diika' bllia Chioza' bia' goncho
(Mt. 22:34-40)*

²⁸ Na' beni to beṇ' chli' chsedi leya' ka golle' legake'. Na' daa gokbe'ile' le wen billi'e xtilleeka', na' wnable'ne':

—¿Beran lliachte nllia leya' bia' goncho?

²⁹ Na' che' Jesúsane':

—Daa lliachte lao diika' nllia Chioza' bia' goncho, len daa na: “Li wzenag, le' beṇ' Israel, Xancho Chioza' zeelo nake' Chios.

³⁰ Goki Xano' Chioza' do yichj do lalloo, axt ga zeelo chajniilo', na' do ka nak fuerz cho'na'.”

³¹ Na' de wchopina' nakan ka dii necha': “Chiyal' gakilo' bish' ljwello'na' ka chaki kwino'.” Bich de dii zak'chi ka diiki.

³² Na' beena' chli' chsedi leya' chi'ene':

—Kakzan nakan, Maestro. Dii li kan' nakan: toz Chiozan' zoa, na' bichga zoa ka le'.

³³ Na' daa gakicho Chioza' do yichj do lall'cho, na' axt ga zeelo chajniicho, na' do ka nak fuerz chechona', na' gaki bish' ljwellchona' ka chaki

kwincho, zak'chan aga ka yog'lo_lte bayix'ka' chit-gake' na' chzeygake'b lao Chioza'.

³⁴ Na' ka gokbe'i Jesúza' kayen'nan billii beena' xtilleena', na' chi'ene':

—Zi lat'zə chyalljilo' kwenche inabia' Chioza' yichjlall'do'na'.

Na' koch no biyaxji inabchile'ne'.

Crístona' nake' xiin dia che dii rey Davina'

(Mt. 22:41-46; Lc. 20:41-44)

³⁵ Na' shlak chli' chsedi Jesúza' ben'ka' lesh' chy-oodo'na', na' chi'e legake':

—¿Berache nazə ben'ka' chli' chsedi leya' nan Crístona', beena' ba mbej Chioza' inabi'e, nake' xiin dia che dii Davina'?

³⁶ La' kwin dii Davina' bi'e dill' daa goll Espíritu che Chioza'ne', kana' wne':

Xancho Chioza' golle' Xan'na':

“Wche' kwit' de shlini,

shlak wzoa' xni'ona' ben'ka' chakzbani li'.”

³⁷ Len kwin dii Davinan' golle' Crístona': Xan', ¿berache nazgake' Crístona' nake' xiin dia che dii Davina'?

Na' ben' zanka' ndop nllag bibagakile' xtilleena'.

Jesúza' chawe' xya che ben'ka' chli' chsedi leya'

(Mt. 23:1-36; Lc. 11:37-54; 20:45-47)

³⁸ Na' ka chli' chsedi Jesúza' ben'ka', chi'e legake':

—Wsak'gale bi gonle ka ben'ka' chli' chsedi leya'. Le chibagakile' gon xe'ka' dii ton, na' cheengakile' yog'zə ben' gapgake' legake' balaan ladj lkwe' ben'.

³⁹ Na' gana' chdop chllagcho choe'lwillcho Chioza' le chibagakile' kwe'gake' gana' chbe' ben'ka' zakii, na' ka'kzə chongake' ga de yel' wao.

⁴⁰ Na' lezkka' chkaatezgake' lill nool wizebka', na' kwenche ina ben' le shlichā zej ben'ki lao Chioza', chongake' ka choe'lwill Chioza' ssha nleeb. Na' daa chongake' ka', ba nakten ile'chgakile' yel' zi' walch.

Daa bzani to nool wizeb, bi'en Chioza'
(Lc. 21:1-4)

⁴¹ To shii chi' Jesúza' gaozə gana' chgoogake' mech che yoodo'na' na' chwie' ben'ka' chgoogake' mecha'. Na' ben' zan ben' wni'aka' wloogake' mech xen.

⁴² Na' bllin to nool wizeb, ben' yesh', wlo'e chop sintabdo'.

⁴³ Na' wne Jesúza' ben'ka' nakgake'ne' txen, chi'e legake':

—Dii li nia' le', nool wizebi ba be'che' dii xench aga ka yog'te ben'ka' wloo mech xench.

⁴⁴ La' yog'gake' daa chichoonzannan' be'gake', san le', naktie' nool yesh', ba wlo'e doxen daa nape' la'kzi chyalljile'n.

13

Jesúza' bi'e dill' wllin lla kwiayi' yoodo'na'
(Mt. 24:1-2; Lc. 21:5-6)

¹ Ka chichej Jesúza' lesh' chyoodo'na', to ben'ka' nakgake'ne' txen chi'ene':

—Maestro, bwiakachi ka xochi nak yajki na' yooki.

² Na' che' Jesúza' le':

—Ka nak yooki chwiale naa, wllin lla kwiayi' yogaan na' ni sto yaj bich kwia koll' ljwellin.

Diika' gak kat' ba zoa te che yell-lioni
(Mt. 24:3-28; Lc. 21:7-24; 17:22-24)

3 Na' ziyajgake' lo Yaa Olívoza' gana' nla' yoodo'na'. Na' shlak chi' Jesúsza' na', Pédrona', Jacóbona', Juanna', na'ch Andréza' wñabgakile'ne' to lezgake':

4—Cheeninto' ino' neto' batran gak daa ba wno'. ¿Bera ka ile'into' gak kwenche inezinto' nan ba zoa gaoshosh gakan?

5 Na' che' Jesúsza' legake':

—Bi we'le latj no siye' le'.

6 La' ben' zan ichej na' inazgake': “Nadaan Crístona”, na' ben' zan shajle'.

7 'Na' ka yenile chak wdil to ni to na', bi illeble. La' chonan byen gaggakan, per aga ba bllin lla te che yell-lionin.

8 La' yidil-len ljwell yellka' na' ben' wñabia'ka' yidil-len ljwellgake'. Na' zan latj gak bedxo', na' gat' wbin, na' kwe' wdil wishesh. Kat' ba chak diiki shinz chzolo ka nak daa yen ile'i ben' yell-liokin.

9 'Wsak'gale, la' gongake' le' lall' na' ben'ka' chñabia' cho' ben' Israel, na' wit chingake' le' gana' chdop chllagcho choe'lwillcho Chioza'. Na' daa nakle nad' txen, lljwa'gake' le' lao ben' wñabia' xenka' na' lao nochlə ben'ka' chñabia', na' ka' gak we'le xtillaana' lawe'ka'.

10 Na' ka zi' te che yell-lioni, chiyal' illilj dill' wen dill' kob cha'na' doxen yell-lioni.

11 Na' kat' ba zjwa'gake' le' lao ben'ka' chñabia', bi sele wñeyi bin ye'le legake', san daa wzajni Chioza' len' inele, la' aga tobia'lall'zlen inele, san Espíritu Sántonan' ine.

12 Beena' zoa ben' bish' golje', leteze' gone'ne' lo na' ben'ka' witgake'ne', na' beena' zoa xiine', leteze' gone' xiine'na lo na' ben'ka' witgake'ne', na' bal

ben', xiine'ka'tezə gongake' xaxneeka' lo na' ben'ka' witgake' legake'.

13 Na' yog'zə ben' gakzbangakile' le' daa nonlilall'le nad'. Per beena' so saki bittez dii yen ile'ile' axt ka yiyoll diika' yen ile'ile', beenan' gat' to yel' mban che' zejli kani.

14 'Na' kat' ile'ile' ba zoa daa nak dii zban inlleb latja' gana' bi chiyal' soan, na'ch ben'ka' lle' Judeana' chiyal' wxonjgake' shajgake' lo yaaka'lə. (Le' chlable dga, li shajniin.)

15 Na' beena' llia koll' lille'na' ni bi gal' yiyetje' lljaleje' dii de loo lille'na'.

16 Na' beena' chda lyixaa, ni bich gal' yiyaje' lille'na' kwenche lljadoyoe' xe'na'.

17 iNyesh'laz gak che noolka' noa' na' noolka' chwall' chxop llana' gak ka'!

18 Li inabi Chioza' bi gak dga kat'ka' chbe' dii zaga',

19 la' yel' zak'zi' wal inlleban nak daa yen ile'ile, daa konoñ' yen ile'kzi dezd ka bxe bsil Chioza' yellioni axt naa, na' kat' ba wde gokan kochno yen ile'i ka len.

20 Na' shi Xancho Chioza' bi wzeshee llaka' gak ka', kono yila shel'ka'. Per wzesheen daa chakile' ben'ka' ba wleje' nakgake' lall' nee.

21 'Na' kat' gak diika', shi no ina le': "Li wwia, ni ze Crístona", wa ine', "Li wwia, na' zie", bi shajle'le.

22 La' wchej ben' siye'gake' inazgake': "Nadaan Crístona", na' ben' chonz ka chyixjee daa che' Chioza'ne', na' wli'gake' no yel' wak kwenche siye'gake' ben', axt shel' wxegakile' siye'gake' ben'ka' ba wlej Chioza' nakgake' lo nee.

23 Wsak'gale. Ba bzenid' le' ka nak yog' diiki zi' gak.

Kat' yiyed Crístona' dii yoblá

(Mt. 24:29-35, 42-44; Lc. 21:25-36)

24 'Na' kat' ba biyoll wde yel' zak'zi'ka', lii yicholte lao wbillá' na' beo'do'na' bich wzeeni'n.

25 Na' beljdo'ka' ixopgakan na' yog' diika' lliá xan yabana' inibgakan.

26 Na' ile'gakile' nad', Ben' Bsel' Chioza' Yell-lioni, zizaa ladj bejka' kon yel' wak choo yel' wak xen cha'na' na' balaan cha'na'.

27 Na' wselaa anjl cha'ka' tap laate yell-lioni axt gana' zeelo chiyollan kwenche yitopgake' ben'ka' nak lall' na'.

28 'Li wwia ka chak che yag yixwewa': kat' chzolo chigaan na' chibia xlaguinna', na' chakbe'ile ba zoa yiyoo la'o linna'.

29 Ka'kzan, kat' ile'ile ba chak yog' diiki ba wnia' le' gak, na' gakbe'ile ba zoa gaoshosh te che yell-lioni.

30 Dii li nia' le', aga ba wit ben'ki zoa naa kat' gak yog' diiki.

31 Yabana' na' yell-lioni te chegakin, san cho'a xtillaana' aga wde bi gak ka nan.

32 'Na' kono nezi bi lla bi gor gak diiki, ni anjlka' lle' yabana', ni nad' nak' Xiin' Chios. Toz Xa' Chioza' nezile'n.

33 'Li wsak', na' li se kwas, na' li we'llwill Chioza', la' bi nezile bat illin lla gakan.

34 Nakan ka ben to ben' ba zoa see shaje' to yell zit', na' golle' ben'ka' chon xshine'na' gapgake' lille'na'. Na' to togake' bene' lall' na'gake' daa

gongake', na' golle' beena' chap cho'a leej che'na' bi guetlalleen.

³⁵ Li se kwas, la' bi nezile bat yila' xan yoona'; shi yilee chaldo'zə, wa yilee chel, wa kat' chbell tezka', wa yilee cheeni'lesdo'.

³⁶ Shi tokonganzə yilee na' yidolile' le' bich ze kwasle.

³⁷ Dga nia' le', lekzka' yog'lol benaan chep'ka', li se kwas.

14

Wloogake' xnezin gox'gake' Jesúza'
(Mt. 26:1-5; Lc. 22:1-2; Jn. 11:45-53)

¹ Chyallj zi chop llazə gal' lni Paskwa', kana' chaogake' yetxtila' bi yoo levadúrana', na' bxozka' chnabia' na' ben'ka' chli' chsedi leya' biyiljall'gake' naklə siye'gake' Jesúza' kwenche gox'gake'ne' na' witgake'ne'.

² Na' che' ljwellgake':

—Bi gox'chone' lo lina' kwenche bi wsees wcheencho ben' yell.

Bwazj to noolə set zixa'yichj Jesúza'
(Mt. 26:6-13; Jn. 12:1-8)

³ Ka zoa Jesúza' Betániana', wyaje' lill beena' le Simón, beena' gok yillwe' daa le lepra. Na' shlak chi'e cho'a mesa', bllin to noolə noxee to lmet de yaj xochi yoollan set zix de nardo na' dii xen zakaan. Na' wdishje' yen lmeta' na' bwazje' set zixa'yichj Jesúza'.

⁴ Na' bal ben'ka' lle' na' bllaagake', na' che' ljwellgake':

—¿Berache benditjz nooli set zixa'?

⁵ Shel' bet'chokle'n na' bi'e mecha' beṅ' yesh'ka',
la' zakaan che shon guiyoa lla che laxj beṅ'.

Na' bsheshlengake' noola' daa bene' ka'.

⁶ Na' che' Jesúza':

—Bibi ye'lene'. ¿Berache chsheshlenzlene'? Daa
ba bene' cha' nakan dii wen.

⁷ Ka nak beṅ' yesh'ka', toshiizi soagake' lad-
jlena', na' wak gaklenle legake' kat'ka' cheenile';
san nad', aga toshiizin soalen' le'.

⁸ Ka nak nooli ba bene' daa zeelo gok bene'.
Ba bwazje' nad' set zixa' kwenche gakshao'zega
kwerp cha'ni kat' wkwash'gake' nad'.

⁹ Dii li nia' le', gattezə we'gake' dill' wen dill' kob
che Chioza' lo yell-lioni, lekzka' we'gake' dill' ka nak
dii wenna' daa ba ben nooli na' lljadingakile'ne'.

*Juda' chchebe' gone' Jesúza' lo na' beṅ' malka'
(Mt. 26:14-16; Lc. 22:3-6)*

¹⁰ Na' Jud Scariota', beena' nake' txen beṅ'ka'
shlin, wyaje' lao bꝛozka' chṅabia' kwenche gone'
Jesúza' lo na'gake'.

¹¹ Na' ka golle' ka', bibagakile' na' bchebgake'
we'gake'ne' mech. Na' wzolo Juda' chinoe' nakan
gone' kwenche gone' Jesúza' lo na'gake'.

Lle'na' zeelo wdaolengake' Jesúza'

*(Mt. 26:17-29; Lc. 22:7-23; Jn. 13:21-30; 1 Co.
11:23-26)*

¹² Na' lla nech che lṅina' kat' chaogake' yetxtila'
daa bi nchixə levadúrana', llana' chitgake'
xil'do'na' chaogake' lṅi Paskwa', beṅ'ka' nak
Jesúza' txen wṅabgakile'ne':

—¿Ga cheenilo' lljasini'anto' xshe' che lṅi
Paskwi?

13 Na' bselee chōpgake', chi'e legake':

—Li shaj yell Jerusalénna' na' yillagle to beṅ' byo zino'e to chee nis, na' lljanólene'.

14 Na' gana' yiyo'e, li yee xan yoona': “Maestrona' ne': ¿Garan zoa yoona' gana' gaolene' beṅ'ka' nakgake'ne' txen lle' lṅi Paskwi?”

15 Na' wliile' le' to yoo xen dii llia shkwia cha'lə ga ba nonshao'tie'. Na' nan' wsini'ale daa gaocho xshe'na'.

16 Na' wza' beṅ'ka' bselee, wyajgake' yella'. Na' gok kon kayen' golle' legake'. Na' bsini'agake' daa gaogake' lle' lṅi Paskwa'.

17 Na' ka goḷ billinlen Jesúza' beṅ'ka' shllin yoona'.

18 Na' shlak chi'gake' cho'a mesa' chaogake', goll Jesúza' legake':

—Dii li nia' le', tole chi'le ni chaolenle nad' gonle nad' lo na' beṅ'ka' chakzi' chakzbani nad'.

19 Na' gokyesh'gakile', na' wzolo to togake' chṅabgakile'ne':

—¿Anadaan gon' ka', lla?

20 Na' che' Jesúza' legake':

—Ladjleni, ka le' nakle shllin chleejlenle nad' yetxtila' loo yeeni, len beena' gon ka'.

21 Ka nak nad', Beṅ' Bsel' Chioza' Yell-lioni, wit beṅ' nad' ka na Cho'a Xtill' Chioza'. Per nyesh'laz gak che beena' gone' nad' lo na' beṅ'ka'. Naklan wen shel'ka' bi golje'.

22 Na' shlak chaogake', beḅ' Jesúza' yetxtila' na' bi'e Chioza' yeḷ' choḅken, na' bxoje'n na' bi'en legake', chi'e:

—Li gao dga. Lennan' kwerp cha'ni.

²³ Na' be_xee kopa', na' bi'e Chioza' ye_l' cho_xken na' bdie'n lawe'ka' na' yog'lo_lgake' wee_jgake' daa yollan.

²⁴ Na' chi'e le_gake':

—Lennan' x_{ch}en'na' daa gon ka gak li dii koba' b_{ch}eb Chioza' gone'. Na' la_ljan kwen_{ch}e gaklenan ben' zan.

²⁵ Dii li nia' le', bichga yeej' x_{is} uvana' axt ki illin lla yeeja'n gana' ch_nabia' Chioza'.

Jesúza' golle' bi w_{ch}eb Pédróna' shi nombi'ene'
(Mt. 26:30-35; Lc. 22:31-34; Jn. 13:36-38)

²⁶ Na' ka biyoll bel_gake' be'la'ogake' Chioza', na'ch wyajgake' lo Yaa Olívoza'.

²⁷ Na' che' Jesúza' le_gake':

—Yog'le le' kwej yich_jle nad'. La' Cho'a Xtill' Chioza' nan: “Wit' beena' chap xil'ka', na' guesles xil'ka' chape'.”

²⁸ Per kat' ba biban' ladj ben' wetka', na' yiyaa Galileana' lljalez' le'.

²⁹ Na' che' Pédróna'ne':

—La'kzi yog' ben'ki choon_lall'gake' li', nad' bi gon' ka'.

³⁰ Na' che' Jesúza'ne':

—Dii li nia' li', naanyel ka zi' kwell teza' de wchop shii, sho_n shii wi'o dill' nan bi nombi'o nad'.

³¹ Na' zeyid Pédróna' chi'ene':

—La' guetlencia' li', biga in_{ia}' bi nombi'a li'.
Na' yog'zgake' che'gake'ne' ka'.

Be'lwil Jesúza' Chioza' gana' le Getsemaní
(Mt. 26:36-46; Lc. 22:39-46)

³² Na' wyajgake' to latj gana' le Getsemaní, na' che' Jesúza' ben'ka' nakgake'ne' txen:

—Nizə li kwe' shlak llje'lwill' Chioza'.

³³ Na' bchi'e Pédrone', Jacóbona', na'ch Juanna', na' wzoloe' chakyeshile' na'ch chakchgaile' dii wal inleeb.

³⁴ Na' chi'e legake':

—Axt chaklikazid' lii guettia' daa le chakyeshii yichjlall'dawaani. Li igaañ nizə na' bi guesle.

³⁵ Na' wzee zi lat' kwite'ka', na' bchek' xibe'na' lo yona' na' be'lwille' Chioza' chi'ene' shi wak ten ka'zə daa wtile'.

³⁶ Na' chi'e:

—Xadawaa, aga bi dii lallj cho' li' de. Bislagach nad' lawi dga ba zoa idil illag'. Per aga gak ka cheenid', san gak ka cheenilo' li'.

³⁷ Na' biyaje' gana' lle'gake' na' ble'ile' ba ches-gake'. Na' chi'e Pédrone':

—Simón, ¿Aba cheson? ¿Abikzə bchejlat'gailo' la'ch' tgor bi gueso'?

³⁸ Bi guesle, li we'lwill Chioza' kwenche bi we'zle latj gon beli chenna' le' gan. Aga ki cheeni yichjlall'do'chona' gonchon per beli chenna' bi chizoin.

³⁹ Na' wyaje' sto shii jelwille' Chioza', na' toz ka golle'ne'.

⁴⁰ Na' ka billine' gana' lle'gake', na' bizle'ile' chizesgake', la' jalawe'ka' bi chizoyin bishgala'. Na' bibi billelgakile' ye'gake'ne'.

⁴¹ Na' ka billine' de wyon shii, chi'e legake':

—¿Ani cheszkzle? Ba gok. Ba bllin gor nad', Ben' Bsel' Chioza' Yell-lioni, gak' lo na' ben' saaxyaka'.

⁴² Li chas. Li sho'. Ba za' beena' gone' nad' lo na'gake'.

*Bex'gake' Jesúza'**(Mt. 26:47-56; Lc. 22:47-53; Jn. 18:2-11)*

⁴³ Ni choe'te Jesúza' dill' ka bllin Juda', beena' wlen ben'ka' shllin, lene' ben' zan ben'ka' bsel' b̄xozka' ch̄nabia' len ben'ka' chli' chsedi leya' na'ch ben' golka' ch̄nabia', nox'gake' spad, na' no yag.

⁴⁴ Na' Juda', beena' bene'ne' lo na' ben'ka', ba be'le' dill', chi'e:

—Beena' wnop', len' gox'le, na' wche'lene'.

⁴⁵ Na' ka bllingake', jabiguae lao Jesúza' na' chi'ene':

—¡Maestro!

Na'ch bnope'ne'.

⁴⁶ Na' lii bex'tegake' Jesúza' bche'gake'ne'.

⁴⁷ Na' to beena' len na' wleje' spad che'na' b̄chogue' sh̄laa nag xmos b̄xoz choo b̄xoz xenna'.

⁴⁸ Na' che' Jesúza' legake':

—¿Berache za'zle nox'le no spad no yag kwenche gox'le nad' ka to no ben' wban?

⁴⁹ Yog' lla wzoa' ladjlena' bli' b̄sedid' loo yoodo'na', na' biga bex'le nad'. Per chonan byen gak ka na Cho'a Xtill' Chioza'.

⁵⁰ Na' yog'lol ben'ka' ben Jesúza' txen wchoonlall'gake'ne' na' b̄xonjgake'.

Bi' xkwidaa bixonj

⁵¹ Na' to bi' xkwid' nob' le' ndobb' to lech'. Na' ka bex'gake'b'

⁵² b̄sam' lechaa ndobb' na' b̄xonjb' gal'yidzb'.

Bdegake' Jesúza' lao ben'ka' ch̄nabia' ben' Israelka'

(Mt. 26:57-68; Lc. 22:54-55, 63-71; Jn. 18:12-14, 19-24)

53 Na' jwa'gake' Jesúza' lao b̄xoz choo b̄xoz xenna', na' bdi'a yog'lol̄ b̄xozka' ch̄nabia' na' ben' golka' ch̄nabia' na'ch ben'ka' chli' chsedi leya'.

54 Na' zit' zit'lə jano Pédrone'ne' bllintie' lesh' lill b̄xoz choo b̄xoz xenna'. Na' wche'lene' ben'ka' chap yoodo'na' chbillgake' cho'a yi'na'.

55 Na' b̄xozka' ch̄nabia' na' yog'lol̄ ben'ka' ch̄nabia' ben' Israelka' lle' na' chiyiljyollgake' ga si' sengake' kwenche wchoglogake' che Jesúza' guete', per bi bllel dii gao xya che'.

56 La'kzi ben' zan chiya de wxiye' che'gake' che', bi bidili cho'a dillaa choe'gake'.

57 Balgake' wzolla'gake' chziye'gake' na' chao-gake' xya che', che'gake':

58 —Neto' ba beninto' ne': “Nad' wchinj yoodo'ni dga ben ben' yell-lioki. Na' ka gak shon̄ lla yilis' ston na' aga ben' yell-lionichan gone'n.”

59 Na' la'kzi wxiye'gake', bi bidili cho'a xtilleeka'.

60 Na' b̄xoz choo b̄xoz xenna' wzollee ladj ben'ka' na' chi'e Jesúza':

—¿Abikz bi ino' cheyi dga na ben'ki cho'?

61 Na' Jesúza' wzie' lliz bibi gollkze'. Na' b̄xoz choo b̄xoz xenna' chizi'ene':

—¿Alin' Crístona', Xiin Chioza'?

62 Na' che' Jesúza'ne':

—Awe, nadaan. Na' ile'ile nad', Ben' Bsel' Chioza' Yell-lioni, chi'a de shli che Chioza', ben' yel' wak choo ben' yel' wak xenna', na' lekzka' ile'ile' zizaa ladj bejka' ze xan yabana'.

63 Na' b̄xoz choo b̄xoz xenna' bsho' bchez' xe'na' kwenche chli'n nan le chllee. Na' chi'e:

—Bich chyalljicho ben' gawe' xya che beeni.

64 Kwınle ba benile ka chñie' che Chioza'. ¿Nakra gonchon?

Na' yog'lolgake' bçhoglogake' che' nan chiyal' guete'.

65 Na' balgake' wzologake' chlla'gake'ne' xeneeka'. Na' bsejgake' jalawe'na' na'ch chgap' chball'gake'ne', na' che'gake'ne':

—Wnashki, non bet li'.

Na' beñ'ka' chap yoodo'na' wdap'gake' xague'na'.

Bi bçheb Pédrona' shi nombi'e Jesúza'

(Mt. 26:69-75; Lc. 22:56-62; Jn. 18:15-18, 25-27)

66 Na' Pédrona' zie' lesh' chyoonā' de lli'lə ka bllin to noolə, beñ' nak xmos bçoz choo bçoz xenna'.

67 Na' ka ble'ile' Pédrona' chbille' cho'a yi'na', na' wzie' chwie'ne' chi'e:

—Lenon' nako' txen Jesús, beñ' Nazareta'.

68 Na' bi bçheb Pédrona', san chi'e:

—Bi nombi'a beena', ni bi nejid' bi dillaan choo.

Na' bicheje' na' jazie' cho'a leeja'. Na' wchell to tez.

69 Na' ble'i noola'ne' sto shii, na' golle' beñ'ka' sto:

—Beenin lene' beñ'ka' nak Jesúza' txen.

70 Na' sto shii bi bçhebe' nake'ne' txen. Na' ka gok zi shloll, beñ'ka' lle' na' gollgake'ne' sto shii:

—Dii li lenon' nako'ne' txen, la' nakbia' nako' beñ' Galilea.

71 Na' Pédrona' wzoloe' chone' zñia, chi'e:

—Chioza' gone' yel' zi' cha' shi chziye'zan nia' bi nombi'ane'.

72 Na' katena' lii wchellte teza' de wchop shii. Na' jadini Pédrona' daa goll Jesúza'ne': “Ka zi' kwell

teza' de wchop shii, na' gak shon shii bi wchebo' shi nombi'o nad'." Na' wzoloe' chbelle'.

15

Bdegake' Jesúza' lao Pilátona'

(Mt. 27:1-2, 11-14; Lc. 23:1-5; Jn. 18:28-38)

¹ Na' ka wyeeni' bidi'a b̄xozka' ch̄nabia' len ben' golka' ch̄nabia', na' ben'ka' chli' chsedi leya' na'ch yog'lol ben'ka' ch̄nabia'gake' yell Israela'. Na' b̄chejgake' Jesúza' jwa'gake'ne' lao Pilátona'.

² Na' w̄nabi Pilátona'ne', chi'e:

—¿Alin' nako' ben' w̄nabia' che ben' Israelka'?

Na' che' Jesúza'ne':

—Kan' ba wno'.

³ Na' b̄xozka' ch̄nabia' dii zan dii chaogake' xya che'.

⁴ Na' che' Pilátona'ne' sto shii:

—¿Abibi inakzo'? Bwialat', dii zan dii chaogake' xya cho'.

⁵ Na' bibi goll Jesúza'ne'. Na' bibani Pilátona' daa bibi golle'ne'.

B̄choglogake' guet Jesúza'

(Mt. 27:15-31; Lc. 23:13-25; Jn. 18:38-19:16)

⁶ Na' kat' chal' Inina', Pilátona' chisane' to ben'ka' nseje' lillyana', beena' inab ben' yellka' wsane'.

⁷ To ben' le Barrabás die' lillyana' len ben'ka' benlene' xyana' daa b̄xegake' wd̄ila'.

⁸ Na' bdi'a bllag ben' yellka', na' che'gake' Pilátona' gone' ka chonkze' yog' yiz.

⁹ Na' che' Pilátona' legake':

—¿Acheenile yisan' ben' w̄nabia' cheleni, le' nakle ben' Israel?

10 La' chakbe'ile' nan b̄xozka' ch̄n̄abia' daa chakxe'zgakile'nen' jwa'gake'ne' lawe'na'.

11 Na' b̄xozka' ch̄n̄abia' bta b̄negake' ben̄'ka' lle' na' kwenche in̄abgake' yisane' Barrabáza'.

12 Na' che' Pilátona' legake':

—Na' bera cheenile' gonid' beena' nale nake' ben̄' wn̄abia' chele, le' ben̄' Israel.

13 Na' besyaagake' che'gake':

—¡Bdee lee yag cruza'!

14 Na' che' Pilátona' legake':

—¿Bera dii malan' bene'?

Na' zizikli besyaagake' che'gake':

—¡Bdee lee yag cruza'!

15 Na' daa goklall' Pilátona' yigaane' wen lao ben̄'ka' lle' na', bisane' Barrabáza'. Na' bene' mandad wit ch̄ingake' Jesúza', na'tech bene'ne' lo na' ben̄'ka' wda'gake'ne' lee yag cruza'.

16 Na' b̄che' soldadka' Jesúza' lesh' chyoonā' gana' chon Pilátona' yel' jos̄chisa', na' biti'a bishaggake' yog' soldadka' lle' na'.

17 Na' bwakwgake'ne' to lech' x̄na, na' bengake' to b̄xoon de xis yesh' na' b̄llingake'n yich̄je'na' ka to corona.

18 Na' wzologake' chosyaagake' nagake':

—¡Soashga ben̄' wn̄abia' che ben̄' Israelka' mbalaz!

19 Na' wdingake' xisa' yich̄je'na', na' b̄llaa x̄eneeka' le', na' b̄chek' xibe'ka' lawe'na' bengake' ka ben̄' chgwee balaan.

20 Ka biyoll b̄tit̄jgakile'ne', bikwasgake' lech' x̄nana' daa b̄xoagake' kolleena' na' biwakwgake'ne' xe'na'kzə. Na' wlejšgake'ne' kwenche lljada'gake'ne' lee yag cruza'.

*Bda'gake' Jesúza' lee yag cruza'
(Mt. 27:32-44; Lc. 23:26-43; Jn. 19:17-27)*

21 To beṅ' yell Cirene lie' Simón, xa Alejándrona' na' Rúfona', zizee lyixaa. Na' ka billague' legake', bengake' byen bi'e yag cruz che Jesúza'.

22 Na' bche'gake' Jesúza' latja' le Gólgota, na' zejin: Latj che llit yichj beṅ' wet.

23 Na' bshabgakile'ne' vino daa nchixə mírrana', per bi weeje'n.

24 Na' bda'gake'ne' lee yag cruza'. Na' soldadka' bengake' to wyitj kwenche yilaagake' xe'na' na' ikaagake' daa yidol' to togake'.

25 Na' chida ga kana' bda'gake'ne' lee yag cruza'.

26 Na' yichj yag cruz che'na' bda'gake' to dii cho'en dill' biche nda'gake'ne' lee yag cruza', nan: “Beenin beṅ' wṅabia' che beṅ' Israelka'.”

27 Na' bda'lengake'ne' chop beṅ' wban, toe' wda' kwite' de shlina', na' stoe' kwite' de robesa'.

28 Na' billinin ka na Cho'a Xtill' Chioza' daa nan: “Ble'gakilene' ka to beṅ' mal.”

29 Na' beṅ'ka' chde na', chnelegakile'ne', na' chta yichje'ka' che'gake':

—iLin' wnzozo' yichinjo' yoodo'na' na' lo shon llazə yiyono'n,

30 bislashki kwino' na' biyetj lee yag cruza'!

31 Na' lekzka' chon bxoza' chṅabia' len beṅ'ka' chli' chsedi leya', chnelegakile'ne', che'gake':

—Beṅ' yoblə gok bisle', na' bi chak yisla kwine'.

32 Shi leile' len' Crístona', beṅ' wṅabia' chechona', cho' beṅ' Israel, yiyetjshkile' lee yag cruza' naa kwenche ile'teicho na' shajle'cho che'.

Na' axt len beṅ'ka' da'lene' lee yag cruza' chnelegakile'ne'.

Ka wit Jesúza'

(Mt. 27:45-56; Lc. 23:44-49; Jn. 19:28-30)

³³ Ka bllin gobill, doxen yell-liona' bichol, bllinte chida shon.

³⁴ Na' chida shon besyaa Jesúza' zillj, chi'e:

—Eloí, Eloí, ¿lama sabactani? —na' zejín: Chios cha', Chios cha', ¿biche ba wlej yichjzo' nad'?

³⁵ Na' bal beñ'ka' lle' na' bengakile' daa wne' na' che'gake':

—Li wzenag, ba chaxe' Elíaza'.

³⁶ Na' zejdo toe' na' bleeje' to dii chzi' nisa' gana' yollə vino daa zichj zla' na' bzoe'n to lo xis kwenche bzoe'n cho'ena' xope'n, na' chi'e:

—Jwayishkile'na', wwiashkicho shi wid Elíaza' yiletje'ne'.

³⁷ Na' besyaadia Jesúza', na'ch wite'.

³⁸ Na' ka wite', lechaa ze loo yoodo'na' bcheza'n gokan choplə.

³⁹ Na' beena' chnabia' soldadka' zie' lao Jesúza', ka benile' besyee na' ble'ile' ka gok wite', na' chi'e:

—Dii li beenin Xiin Chioza'.

⁴⁰ Lekzka' zi bal noolka' lle'gake' de zit'lə chwia-gake'. Na' ladje'ka' len María beñ' Magdálana', na' Saloména', na'ch María, beena' nak xna' Joséna' len Jacobona', beñ' neshaa.

⁴¹ Noolkin wnogake' Jesúza' na' goklengake'ne' kana' zoe' gana' mbani Galileana'. Na' lekzka' len zanch noolka' beñ'ka' wyajlengake'ne' Jerusalénna'.

Bkwash'gake' Jesúza'

(Mt. 27:57-61; Lc. 23:50-56; Jn. 19:38-42)

* 15:34

⁴² Na' llana' gok ka' nakan llana' chsini'a beṅ Israelka' che llana' chombaṅgake'. Na' ka goḷ,

⁴³ bllin José beṅ Arimatéana', beena' nak txen beṅ'ka' chṅabia' beṅ Israelka', na' lene' none' lez beena' wsel' Chioza' inabi'e. Na' biyaxjile' wyaje' lao Pilátona' janabe' lsens yiletje' kwerp che Jesúza'.

⁴⁴ Na' bibani Pilátona' daa ba wite'. Na' goxe' beena' chṅabia' soldadka' kwenche inabilene' shi dii likzan ba witen'.

⁴⁵ Na' ka che' beena' chṅabia' soldadka' ba wite' na' wxenlallee, na' bi'e lsens biletj Joséna' kwerp che'na'.

⁴⁶ Na' wxi' Joséna' to lech' de lino na' biletje' kwerp che Jesúza' na' bitobe'ne' lechaa. Na' jlo'ene' to loo blej, na' bisejile'n to yaj xen.

⁴⁷ Na' María beṅ yell Magdálana', na' María, xṅa' Joséna', chwiayen'gake' gana' jlo'ene'.

16

Biban Jesúza' ladj beṅ wetka'

(Mt. 28:1-10; Lc. 24:1-12; Jn. 20:1-10)

¹ Na' ka wde lla sabda', llana' chombaṅ beṅ Israelka', María beṅ Magdálana' len Saloména', na'ch María, xṅa' Jacóbona', wxi'gake' diika' chla' zix kwenche wlla'gake'n kwerp che Jesúza'.

² Na' lla nech che xmanna', shinza chla' wbilldo'na', wyajgake' cho'a ba che'na'.

³ Na' ka zejgake' che' ljwellgake':

—¿Nora gaklen cho' wkwase' yaja' daa chi' cho'a ba che'na', lla?

⁴ Per ka bllingake', ble'gakile' bich chi' yaj xenna' cho'a bana'.

⁵ Na' ka wyoogake' loo bana', ble'gakile' chi' to beñ' xkwid' de shli che bana' nakwe' to lech' llyish dii ton. Na' le blleb noolka'.

⁶ Na' chi'e legake':

—Bi illeble. Le' chiyilje Jesús, beñ' Nazareta', beena' bda'gake' lee yag cruza'. Ba biban beena', bich zoe' ni. Li wwiakachi gana' wdixgake'ne'.

⁷ Li yiyaj lao beñ'ka' nakgake'ne' txen na' len lao Pédrona', na' li lljayellgake': “Ba ziyaje' zjaleze' le' Galileana', na' na' yile'ile'ne' sto shii, kon ka wne' le'.”

⁸ Na'ch bichej noolka' loo bana' ziyajdogake' axt chxiztitgake' daa le chllebgake'. Na' kono bi goll-gake' daa le bllebgake'.

*Bli'lao Jesúza' María beñ' yell Magdálana'
(Jn. 20:11-18)*

⁹ Na' ka biban Jesúza' ladj beñ' wetka' lla nech che xmanna' shzildo', zigaate bli'lawe' María beñ' yell Magdálana', beena' bibej Jesúza' gall dii xiw'ka'.

¹⁰ Na' Maríana' wyaje' lao beñ'ka' wdalen Jesúza' txen. Na' ka blline' lawe'ka' le chakyesh'gakile' na' chbellgake', na' golle' legake' ba biban Jesúza'.

¹¹ Na' ka beni beñ'ki mban Jesúza' na' ba ble'teyi Maríana'ne', bi wyajle'gake'.

*Bli'lao Jesúza' chop beñ'ka' nakgake'ne' txen
(Lc. 24:13-35)*

¹² Ka biyoll gok ka', chop beñ'ka' nak Jesúza' txen ngoogake' nez zejgake' lyixaa, na' bli'lawe' legake' na' nake' nlla'lə.

13 Na' biyajgake' gana' lle' ben'ka' sto, jayell-gake' legake' ba ble'gakile'ne', na' ni chegake' bi wyajle'gake'.

Jesúza' golle' ben'ka' nakgake'ne' txen we'gake' xtilleena' doxen lo yell-lioni

(Mt. 28:16-20; Lc. 24:36-49; Jn. 20:19-23)

14 Na' wdetech, bli'lao Jesúza' ben'ka' shnej shlak chi'gake' chaogake'. Na' bsheshlene' legake' daa bi chajle'gake' na' daa nakgake' lall'do' chech, la' bi wyajle'gake' che ben'ka' ble'gakile'ne' ka wde bibane'.

15 Na' chi'e legake':

—Li shaj doxen yell-lioni, li lljtixje'i yog'lol ben' dill' wen dill' kob cha'na'.

16 Beena' shajle' na' choe' nisa', gat' yel' mban che' zejli kani, san beena' bi shajle', chogbi'a kwiajee.

17 Na' diikin gon ben'ka' nonlilall' nad': wchingake' lia'na' yibejgake' dii xiwaa yoo ben'; na' inegake' dill' kob dii bi nombia'gake';

18 na' shi gonzin gox'gake' no bel' wa yeejgake' dii nak yierb, aga bi gakgakile'. Na' lekzka' wxoa neeka' yichj ben' we'ka' na' yiyakgakile'.

Biyep Jesúza' yabana'

(Lc. 24:50-53)

19 Ka biyoll bshaljlene' legake', Xancho Jesúza' biyep'e yabana' na' jachi'e kwit Chioza' shlaa de shlina'.

20 Na' ben'ka' nakgake'ne' txen wyajgake' doxen jtixje'gake' cho'a xtilleena' na' Xancho Jesúza' goklene' legake' bengake' yel' wakka' kwenche wyajle' ben' dillaa be'gake' nakan dii li.

**Dill' wen dill' Kob Che Jesucrístona'
New Testament in Zapotec, Cajonos (MX:zad:Zapotec,
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
f98bf0c8-4467-559d-82ab-96644a44d38f